

ओं नमः परमात्मने, श्री महागणपतये नमः,

श्री गुरुभ्यो नमः, ह॒रिः ओं ॥

कृष्ण यजुर्वेदीय तैत्तिरीय संहिता

पद पाठः (वाक्य सहित)

प्रथमकाण्डे अष्टमः प्रश्नः

Notes:

- Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
- Please download our vedic compilations from our web site “www.vedavms.in”

Version Notes:

This is now the current Version 0.3 dated August 31, 2020.

1. This replaces the earlier version 0.2 dated June 30, 2020.
2. No Corrections found or reported. This is only a date change version.
3. Required convention, style and presentation improvements or standardisations has been done wherever applicable.
4. In this compilation the Samita Vaakyams have been suitably aligned, synchronised and refurbished in line with “Pada Paatam”.

Previous Versions

1st	Version Number	0.0 dated 31st May 2019
2nd	Version Number	0.1 dated 31st March 2020
3rd	Version Number	0.2 dated 30th June 2020

Table of Contents

1 कृष्ण यजुर्वेदीय तैत्तिरीय संहिता पद पाठे प्रथमं काण्डं	5
1.8 प्रथमकाण्डे अष्टमः प्रश्नः – राजसूयः	5

ओं नमः परमात्मने, श्री महागणपतये नमः,

श्री गुरुभ्यो नमः ॥ हरिः ओं

1 कृष्ण यजुर्वेदीय तैत्तिरीय संहिता पद पाठे प्रथमं

काण्डं

1.8 प्रथमकाण्डे अष्टमः प्रश्नः – राजसूयः

TS 1.8.1.1

अनु॑म॒त्यै॒ पुरो॑डा॒श-म॒ष्टाक॑पा॒लं निर्व॑पति॒ धेनु॑र्दक्षि॒णाये॒ प्रत्य॑ञ्चः
शँ॒याया॑ अव॒शीय॑न्ते॒ तं नैर्ऋ॑त-मे॒कक॑पा॒लं कृ॒ष्णं वा॑सः॒ कृ॒ष्णातू॑षं
दक्षि॑णा॒ वीहि॒ स्वाहाऽऽहु॑तिं जुषा॒ण ए॒ष ते नि॑र्ऋ॒ते भा॒गो भू॑ते
हवि॑ष्म॒त्यसि॒ मुञ्चे॑म-म॒ह॒सः स्वाहा॒ नमो॑ य इ॒दं च॒काराऽऽदि॒त्यं
चरुं॑ निर्व॑पति॒ वरो॑ दक्षि॑णाऽऽग्ना॒वैष्ण॑व-मे॒काद॑शकपा॒लं
वा॒मनो॑ व॒ही दक्षि॑णा॒ ऽग्नी॒षोमी॒य - [] 1

TS 1.8.1.1 (Padam)

अनु॑म॒त्या इत्य॑नु-म॒त्यै । पुरो॑डा॒शम् । अ॒ष्टाक॑पा॒लमि॒त्यष्टा॑-क॒पा॒लम् ।
नि॒रि॒ति । व॒प॒ति । धे॒नुः । दक्षि॑णा । ये । प्र॒त्य॑ञ्चः । श॒म्या॑याः ।

पद पाठे (वाक्य सहित) – प्रथमकाण्डे – अष्टमः प्रश्नः

अ॒व॒शी॒य॒न्त॒ इत्य॑व – शी॒य॒न्ते॑ । तम् । नै॒र्ऋ॒त॒मि॒ति॑ नैः – ऋ॒तम् ।

ए॒क॒क॒पा॒ल॒मि॒त्ये॒क॑ – क॒पा॒लम् । कृ॒ष्णम् । वा॒सः॑ ।

कृ॒ष्ण॒तू॒ष॒मि॒ति॑ कृ॒ष्ण॒-तू॒षम् । दक्षि॑णा । वी॒ति॑ । इ॒हि॒ । स्वा॒हा॑ ॥

आ॒हु॒ति॒मि॒त्या॒-हु॒ति॒म् । जु॒षा॒णः॑ । ए॒षः॑ । ते॒ । नि॒र्ऋ॒त॒ इति॑

निः-ऋ॒ते॑ । भा॒गः॑ । भू॒ते॑ ॥ ह॒वि॒ष्म॒ती॑ । अ॒सि॒ । मु॒ञ्च॑ । इ॒मम् ।

अ॒ह॒सः॑ । स्वा॒हा॑ ॥ न॒मः॑ । यः॑ । इ॒दम् । च॒का॒र॑ । आ॒दि॒त्यम् ।

च॒रुम् । नि॒रि॒ति॑ । व॒प॒ति॑ । वरः॑ । दक्षि॑णा ।

आ॒ग्ना॒वै॒ष्ण॒व॒मि॒त्या॒ग्ना॑ – वै॒ष्ण॒वम् ।

ए॒का॒द॒श॒क॒पा॒ल॒मि॒त्ये॒का॒द॒श॑ – क॒पा॒लम् । वा॒म॒नः॑ । व॒ही॑ । दक्षि॑णा ।

अ॒ग्नी॒षो॒मी॒य॒मि॒त्य॒ग्नी॑ – सो॒मी॒यम् । 1 (50)

TS 1.8.1.2

मे॒का॒द॒श॒क॒पा॒लं॑ हिर॒ण्यं॑ दक्षि॑णै॒न्द्र-मे॒का॒द॒श॒क॒पा॒ल-मृ॒ष॒भो॑ व॒ही॑

दक्षि॑णाऽऽग्ने॒य-म॒ष्टा॒क॒पा॒ल॒मै॒न्द्रं॑ द॒द्ध्यृ॒ष॒भो॑ व॒ही॑ दक्षि॑णै॒न्द्रा॒ग्नं॑

द्वा॒द॒श॒क॒पा॒लं॑ वै॒श्व॒दे॒वं॑ च॒रुं॑ प्रथ॒म॒जो॑ व॒त्सो॑ दक्षि॑णा सौ॒म्यं॑ श्या॒मा॒कं॑

च॒रुं वा॑सो दक्षि॑णा सर॑स्वत्यै च॒रुं सर॑स्वते च॒रुं मि॒थुनौ॑
गावौ॑ दक्षि॑णा ॥ 2

TS 1.8.1.2 (Padam)

एका॑दशकपाल॒मित्येका॑दश-क॒पालम् । हि॒रण्यम् । दक्षि॑णा । ऐ॒न्द्रम् ।
एका॑दशकपाल॒मित्येका॑दश - क॒पालम् । ऋ॒षभः । व॒ही । दक्षि॑णा ।
आ॒ग्नेयम् । अ॒ष्टाक॑पाल॒मित्यष्टा॑-क॒पालम् । ऐ॒न्द्रम् । दधि॑ ।
ऋ॒षभः । व॒ही । दक्षि॑णा । ऐ॒न्द्रा॒ग्नमित्यै॑न्द्र - अ॒ग्नम् ।
द्वाद॑शकपाल॒मिति॑ द्वाद॑श - क॒पालम् । वै॒श्वदे॑वमिति॑ वै॒श्व - दे॒वम् ।
च॒रुम् । प्र॒थम॑ज इति॑ प्रथम - जः । व॒त्सः । दक्षि॑णा । सौ॒म्यम् ।
श्या॒माक॑म् । च॒रुम् । वा॑सः । दक्षि॑णा । सर॑स्वत्यै । च॒रुम् ।
सर॑स्वते । च॒रुम् । मि॒थुनौ॑ । गावौ॑ । दक्षि॑णा ॥ 2 (34)

(अ॒ग्नी॒षोमी॒यं-च॑तु॒स्त्रिंश॑च्च)(A1)

TS 1.8.2.1

आ॒ग्नेय॑म॒ष्टाक॑पालं॒ निर्व॑पति सौ॒म्यं च॒रुं सा॑वि॒त्रं-द्वाद॑शकपालं
सा॒रस्व॑तं च॒रुं पौ॒ष्णं च॒रुं मा॒रुतं॑ स॒प्तक॑पालं॒ वै॒श्वदे॑वी-मा॒मिक्षां॑
द्या॒वापृ॑थि॒व्य-मे॒कक॑पालं ॥ 3

TS 1.8.2.1 (Padam)

आ॒ग्ने॒यम् । अ॒ष्टा॒क॒पा॒ल॒मि॒त्य॒ष्टा॒-क॒पा॒लम् । नि॒रि॒ति॒ । व॒प॒ति॒ ।
सौ॒म्यम् । च॒रुम् । सा॒वि॒त्रम् । द्वा॒द॒श॒क॒पा॒ल॒मि॒ति॒ द्वा॒द॒श॒-क॒पा॒लम् ।
सा॒र॒स्व॒तम् । च॒रुम् । पौ॒ष्णम् । च॒रुम् । मा॒रु॒तम् । स॒प्त॒क॒पा॒ल॒मि॒ति॒
स॒प्त॒-क॒पा॒लम् । वै॒श्व॒दे॒वी॒मि॒ति॒ वै॒श्व॒-दे॒वी॒म् । आ॒मि॒क्षा॒म् ॥
द्या॒वा॒पृ॒थि॒व्य॒मि॒ति॒ द्या॒वा॒-पृ॒थि॒व्य॒म् ॥ ए॒क॒क॒पा॒ल॒मि॒त्ये॒क॒-क॒पा॒लम् ॥

3 (18) (आ॒ग्ने॒य॒ꣳ सौ॒म्यं॑ मा॒रु॒त॒-म॒ष्टा॒द॒श॒) (A2)

TS 1.8.3.1

ऐ॒न्द्रा॒ग्न॒-मे॒का॒द॒श॒क॒पा॒लं मा॒रु॒ती॒-मा॒मि॒क्षां॑ वा॒रु॒णी॒-मा॒मि॒क्षां॑
का॒य॒मे॒क॒क॒पा॒लं प्र॒घा॒स्यान् ह॒वा॒म॒हे मा॒रु॒तो य॒ज्ञ॒वा॒ह॒सः
क॒रं॒भे॒ण स॒जोष॑सः ॥
मो षू ण इ॒न्द्र पृ॒थ्सु॑ दे॒वास्तु॑ स्म ते शु॒ष्मि॒न्न॒व॒या ।
म॒ही ह्य॑स्य मी॒ढु॒षो य॒व्या । ह॒वि॒ष्म॒तो मा॒रु॒तो व॒न्द॒ते गीः ॥
यद् ग्रामे यद॒रण्ये॑ यथ् स॒भायां॑ य॒दि॒न्द्रि॒ये ।
यच्छू॒द्रे यद॒र्य ए॒नश्च॑ कृ॒मा॒व॒यं ।
यदे () क॒स्याधि॑ ध॒र्म॒णि तस्या॑व॒य॒ज॒न॒म॒सि॒ स्वाहा॑ ॥

अ॒क्रन् क॒र्म क॒र्मकृ॑तः स॒ह वा॒चा म॒योभु॑वा ।

दे॒वेभ्यः॑ क॒र्म कृ॑त्वाऽस्तं॒ प्रेत॑ सु॒दानवः॑ ॥ 4

TS 1.8.3.1 (Padam)

ऐ॒न्द्रा॒ग्नमि॒त्यैन्द्र॑ – अ॒ग्नम् । ए॒काद॑शक॒पालमि॒त्येका॑दश-क॒पालम् ।

मा॒रुती॑म् । आ॒मिक्षा॑म् । वा॒रुणी॑म् । आ॒मिक्षा॑म् । का॒यम् ।

ए॒कक॑पालमि॒त्येक॑-क॒पालं । प्र॒घास्या॑निति॒ प्र-घा॑स्यान् । ह॒वाम॑हे ।

म॒रुतः॑ । य॒ज्ञवा॑हस॒ इति॑ य॒ज्ञ – वा॑हसः । क॒रंभे॑ण ।

स॒जोष॑स॒ इति॑ स – जोष॑सः ॥ मो॒ इति॑ । स्वि॒ति । नः॑ । इ॒न्द्र ।

पृ॒थ्विस्वि॑ति॒ पृत्-सु॑ । दे॒व । अ॒स्तु । स्म । ते॑ । शु॒ष्मिन् । अ॒वया॑ ॥

म॒ही । हि॑ । अ॒स्य । मी॒ढुषः॑ । य॒व्या ॥ ह॒विष्म॑तः । म॒रुतः॑ । व॒न्दते॑ ।

गीः ॥ यत् । ग्रा॒मे । यत् । अ॒रण्ये॑ । यत् । स॒भाया॑म् । यत् ।

इ॒न्द्रि॒ये ॥ यत् । शू॒द्रे । यत् । अ॒र्ये॑ । ए॒नः । च॒कृ॒म । व॒यम् ॥

यत् () । ए॒कस्य॑ । अ॒धीति॑ । ध॒र्मणि॑ । तस्य॑ ।

अ॒वय॑जनमि॒त्यव॑-य॒जनम् । अ॒सि । स्वा॒हा ॥ अ॒क्रन् । क॒र्म ।

क॒र्मकृ॑त॒ इति॑ क॒र्म-कृ॑तः । स॒ह । वा॒चा । म॒योभु॑वेति॒ मयः॑-भु॒वा ॥

दे॒वेभ्यः॑ । क॒र्म । कृ॒त्वा । अस्त॑म् । प्रेति॑ । इ॒त ।

सु॒दान॒व इति॑ सु॒-दान॒वः ॥ 4 (70)

(वयं॑ चै॒द्-वि॒शति॑श्च) (A3)

TS 1.8.4.1

अ॒ग्नये॑ऽनी॒कव॑ते पु॒रोडा॑श-म॒ष्टाक॑पालं निर्व॑पति सा॒कम् सूर्ये॑णोद्य॒ता

म॒रुद्भ्यः॑ सा॒न्तप॑नेभ्यो म॒द्ध्यन्दि॑ने च॒रुं म॒रुद्भ्यो॑ गृ॒हमे॒धिभ्यः॑

सर्वा॑सां दु॒ग्धे सा॒यं च॒रुं पू॒र्णा द॒र्वि परा॑पत सु॒पूर्णा पुन॑रा प॒त ।

व॒स्ने॒व वि क्री॑णावहा इ॒षमूर्ज॑श्च श॒तक्र॑तो ॥

दे॒हि मे द॑दामि ते नि मे॑ धेहि नि ते॑ द॒धे ।

नि॒हार॑मि॒न्नि मे ह॑रा नि॒ हारं॑- [] 5

TS 1.8.4.1 (Padam)

अ॒ग्नये॑ । अ॒नीक॑व॒त इत्य॑नी॒क - व॒ते । पु॒रोडा॑शम् ।

अ॒ष्टाक॑पालमि॒त्यष्टा॑-क॒पालम् । नि॒रिति॑ । व॒पति॑ । सा॒कम् । सूर्ये॑ण ।

उ॒द्यते॑त्यु॒त् - य॒ता । म॒रुद्भ्य॑ इति॑ म॒रुत् - भ्यः॑ ।

सा॒न्तप॑नेभ्य॒ इति॑ सां - त॒पने॑भ्यः । म॒द्ध्यन्दि॑ने । च॒रुम् ।

म॒रुद्भ्य॑ इति॑ म॒रुत्-भ्यः॑ । गृ॒हमे॒धिभ्य॑ इति॑ गृ॒हमे॒धि-भ्यः॑ ।

सर्वा॑साम् । दु॒ग्धे । सा॒यम् । च॒रुम् । पू॒र्णा । द॒र्वि । परेति॑ । प॒त ।
सुपू॒र्णेति॑ सु – पू॒र्णा । पुनः॑ । एति॑ । प॒त ॥ व॒स्ना । इ॒व । वीति॑ ।
क्री॒णाव॒है । इ॒षम् । ऊ॒र्जम् । श॒तक्र॑तो इति॑ श॒त-क्र॑तो ॥ दे॒हि । मे ।
ददा॑मि । ते । नीति॑ । मे । धे॒हि । नीति॑ । ते । द॒धे ॥ नि॒हार॒मिति॑
नि-हा॒रम् । इत् । नीति॑ । मे । ह॒र । नि॒हार॒मिति॑ नि-हा॒रम् । 5 (50)

TS 1.8.4.2

नि॑ ह॒रामि॑ ते ॥

म॒रुद्भ्यः॑ क्री॒डिभ्यः॑ पु॒रोडा॑शꣳ स॒प्तक॑पालं निर्वपति॑ सा॒कꣳ
सू॒र्येणो॑द्यताऽऽग्ने॒य-म॒ष्टाक॑पालं निर्वपति॑ सौ॒म्यं च॒रुꣳ
सा॒वि॒त्रं द्वा॒दश॑कपालꣳ सा॒रस्व॑तं च॒रुं पौ॒ष्णं च॒रुमै॑न्द्रा॒ग्न-
मे॒काद॑शकपाल-मै॒न्द्रं च॒रुं वै॑श्वक॒र्मण-मे॒कक॑पालं ॥ 6

TS 1.8.4.2 (Padam)

नीति॑ । ह॒रामि॑ । ते ॥ म॒रुद्भ्य इति॑ म॒रुत् – भ्यः॑ । क्री॒डिभ्य इति॑
क्री॒डि-भ्यः॑ । पु॒रोडा॑शम् । स॒प्तक॑पालमिति॑ स॒प्त-क॑पालम् ।
नि॒रिति॑ । व॒पति॑ । सा॒कम् । सू॒र्येण॑ । उ॒द्यते॑त्युत् – य॒ता ।
आ॒ग्ने॒यम् । अ॒ष्टाक॑पालमित्य॒ष्टा-क॑पालम् । नि॒रिति॑ । व॒पति॑ ।

सौ॒म्यम् । च॒रुम् । सा॒वि॒त्रम् । द्वा॒द॒श॒क॒पा॒ल॒मि॒ति॒ द्वा॒द॒श॒-क॒पा॒ल॒म् ।
सा॒र॒स्व॒तम् । च॒रुम् । पौ॒ष्णम् । च॒रुम् । ऐ॒न्द्रा॒ग्न॒मि॒त्यै॒न्द्र - अ॒ग्नम् ।
एका॒द॒श॒क॒पा॒ल॒मि॒त्येका॒द॒श - क॒पा॒ल॒म् । ऐ॒न्द्रम् । च॒रुम् ।
वै॒श्व॒क॒र्म॒ण॒मि॒ति॒ वै॒श्व - क॒र्म॒ण॒म् ॥
एक॒क॒पा॒ल॒मि॒त्येक॒-क॒पा॒ल॒म् । 6(30) (हरा॑ नि॒हारं॑-त्रि॒ंश॒च्च॑) (A4)

TS 1.8.5.1

सो॒मा॒य॒ पि॒तृ॒म॒ते॒ पु॒रो॒डा॒शं॑ ष॒ट्क॒पा॒लं॑ नि॒र्व॒प॒ति॒ पि॒तृ॒भ्यो॑
ब॒र्हि॒षद्भ्यो॑ धा॒नाः पि॒तृ॒भ्यो॑ऽग्नि॒ष्वा॒त्ते॒भ्यो॑ ऽभि॒वा॒न्या॒यै दु॒ग्धे
म॒न्थ॒मे॒तत् ते॑ त॒त॒ ये च॒ त्वा-म॒न्वे॒तत् ते॑ पि॒ता॒म॒ह प्र॒पि॒ता॒म॒ह॒ ये च॒
त्वा॒म॒न्व॒त्र पि॒त॒रो य॒था॒भा॒गं म॒न्द॒ध्वं॑ सु॒स॒न्दृ॒शं॑ त्वा व॒यं म॒घ॒वन्
म॒न्दि॒षी॒म॒हि ।

प्र॒नू॒नं पू॒र्ण॒व॒न्धु॒रः स्तु॒तो या॒सि॒ व॒शां॑ अनु॑ ।

यो॒जा न्वि॒न्द्र ते॒ ह॒री ॥ 7

TS 1.8.5.1 (Padam)

सो॒मा॒य॒ । पि॒तृ॒म॒त॒ इति॑ पि॒तृ - म॒ते॒ । पु॒रो॒डा॒शम्॑ । ष॒ट्क॒पा॒ल॒मि॒ति॒
ष॒ट् - क॒पा॒ल॒म् । नि॒रि॒ति॒ । व॒प॒ति॒ । पि॒तृ॒भ्य॒ इति॑ पि॒तृ - भ्यः॑ ।

ब॒र्हि॒षद्भ्य॑ इति॑ ब॒र्हि॒षद्-भ्यः॑ । धा॒नाः ।
पि॒तृभ्य॑ इति॑ पि॒तृ-भ्यः॑ । अ॒ग्नि॒ष्वा॒त्तेभ्य॑ इत्य॑ग्नि-स्वा॒त्तेभ्यः॑ ।
अ॒भि॒वा॒न्या॒या इत्य॑भि-वा॒न्या॒यै । दु॒ग्धे । म॒न्थम् । ए॒तत् । ते । त॒त ।
ये । च । त्वा॒म् । अ॒न्वि॒ति । ए॒तत् । ते । पि॒ता॒म॒ह । प्र॒पि॒ता॒म॒हेति॑
प्र - पि॒ता॒म॒ह । ये । च । त्वा॒म् । अ॒न्वि॒ति । अ॒त्र । पि॒तरः॑ ।
य॒था॒भा॒ग॒मि॒ति यथा॑ - भा॒गम् । म॒न्द॒ध्वम् । सु॒स॒न्दृ॒श॒मि॒ति
सु - स॒न्दृ॒श॒म् ॥ त्वा । व॒यम् । म॒घ॒व॒न्नि॒ति म॒घ-व॒न् । म॒न्दि॒षी॒म॒हि ॥
प्रेति॑ । नू॒नम् । पू॒र्ण॒व॒न्धु॒र इति॑ पू॒र्ण - व॒न्धु॒रः । स्तु॒तः । या॒सि ।
व॒शा॒न् । अ॒नु ॥ यो॒जा ॥ नु । इ॒न्द्र । ते । ह॒री इति॑ ॥ 7 (50)

TS 1.8.5.2

अ॒क्ष॒न्न॒मी॒म॒द॒न्त॒ ह्य॒व प्रि॒या अ॒धू॒ष॒त ।
अ॒स्तो॒ष॒त स्व॒भा॒न॒वो वि॒प्रा न॒वि॒ष्ट॒या म॒ती ।
यो॒जा न्वि॒न्द्र ते ह॒री ॥
अ॒क्ष॒न् पि॒त॒रोऽमी॑म॒द॒न्त पि॒त॒रोऽती॑तृ॒प॒न्त पि॒त॒रोऽमी॑मृ॒ज॒न्त पि॒तरः॑ ॥
प॒रे॒त पि॒तरः॑ सो॒म्या ग॒म्भी॒रैः प॒थि॒भिः पू॒र्व्यैः ।

अथा॑ पि॒तृन्त् सु॒विद॒त्रां॑ अ॒पीत॑ य॒मेन॑ ये स॒धमा॒दं म॑दन्ति ॥
मनो॑ न्वा हु॒वामहे॑ ना॒राश॑सेन॒ स्तोमे॑न पि॒तृणां॑ च॒ मन्म॑भिः ॥

आ – [] 8

TS 1.8.5.2 (Padam)

अक्ष॑न् । अमी॑मदन्त । हि । अवे॑ति । प्रि॒याः । अधू॑षत ॥ अस्तो॑षत ।
स्व॒भान॑व इति॒ स्व-भान॑वः । वि॒प्राः । नवि॑ष्ठया । म॒ती ॥ योजा॑ । नु ।
इन्द्र॑ । ते । हरी॑ इति ॥ अक्ष॑न् । पि॒तरः॑ । अमी॑मदन्त । पि॒तरः॑ ॥
अती॑तृपन्त । पि॒तरः॑ । अमी॑मृजन्त । पि॒तरः॑ । परे॑ति । इत॑ । पि॒तरः॑ ।
सो॒म्याः । गंभी॑रैः । प॒थिभि॑रिति॒ प॒थि-भिः॑ । पू॒र्व्यैः ॥ अथ॑ ।
पि॒तृन् । सु॒विद॒त्रानि॑ति सु – वि॒दत्रा॑न् । अ॒पीति॑ । इत॑ । य॒मेन॑ । ये ।
स॒धमा॒दमि॑ति स॒ध – मा॒दम् । म॑दन्ति ॥ मनः॑ । नु । एति॑ ।
हु॒वामहे॑ । ना॒राश॑सेन॒ स्तोमे॑न । पि॒तृणा॑म् । च ।
मन्म॑भिरिति॒ मन्म॑ – भिः ॥ एति॑ । 8 (50)

TS 1.8.5.3

न ए॒तु मनः॑ पुनः॑ क्र॒त्वे दक्ष॑ाय जी॒वसे॑ ।
ज्योक् च॑ सू॒र्यं दृ॒शे ॥

पुन॑र्नः पि॒तरो॑ मनो॑ ददा॒तु दै॒व्यो॑ ज॒नः ।

जी॒वं व्रा॑त॒ऽस॒चेम॑हि ॥

यद॒न्त॒रि॒क्षं पृ॒थि॒वीमु॒त द्यां॑ य॒न्मा॒तरं॑ पि॒तरं॑ वा जि॒हि॒ऽसि॒म ।

अ॒ग्नि॒र्मा तस्मा॑दे॒नसो॑ गा॒र्ह॒प॒त्यः प्र मु॑ञ्चतु दु॒रि॒ता या॒नि च॒कृ॒म
क॒रोतु॑ मा-म॒नेन॑सं ॥ 9

TS 1.8.5.3 (Padam)

नः । ए॒तु । मनः । पु॒नः । क॒र्त्वे । दक्षाय । जी॒वसे ॥ ज्योक् । च ।

सूर्य॑म् । दृ॒शे ॥ पु॒नः । नः । पि॒तरः । मनः । ददा॒तु । दै॒व्यः ।

ज॒नः ॥ जी॒वम् । व्रा॑तम् । स॒चेम॑हि ॥ यत् । अ॒न्त॒रि॒क्षम् । पृ॒थि॒वीम् ।

उ॒त । द्याम् । यत् । मा॒तरम् । पि॒तरम् । वा । जि॒हि॒ऽसि॒म ॥ अ॒ग्निः ।

मा । तस्मा॑त् । ए॒नसः । गा॒र्ह॒प॒त्य इति॑ गा॒र्ह-प॒त्यः । प्रेति॑ ।

मु॑ञ्चतु । दु॒रि॒तेति॑ दुः – इ॒ता । या॒नि । च॒कृ॒म । क॒रोतु॑ । माम् ।

अ॒ने॒न॒सम् ॥ 9 (44)

(ह॒री-म॒न्म॑भि॒रा-च॒तुश्च॑त्वा॒रि॒ऽश॑च्च) (A5)

TS 1.8.6.1

प्रति॑पू॒रुष॑मे॒क॒क॒पा॒ला॒न्निर्व॑पत्ये॒क॒-म॒तिरि॑क्तं या॒वन्तो॑ गृ॒ह्याः॑
स्म॒स्तेभ्यः॑ क॒म॒करं॑ प॒शूना॑ञ् श॒र्मा॑सि श॒र्म॒ यज॑मानस्य श॒र्म॒ मे
य॒च्छै॒क॒ ए॒व रु॒द्रो न॑ द्वितीयाय तस्थ आ॒खु॒स्ते रु॒द्र प॒शुस्तं॑ जुषस्वैष
ते रु॒द्र भा॒गः स॒ह स्व॒स्राऽम्बि॑कया तं जुषस्व भेषजं गवेऽश्राय
पुरुषाय भेषजमथो अ॒स्मभ्यं॑ भेषजञ् सुभेषजं - [] 10

TS 1.8.6.1 (Padam)

प्रति॑पू॒रुष॑मि॒ति॒ प्रति॑-पू॒रुष॑म् । ए॒क॒क॒पा॒ला॒नित्ये॑क॒-क॒पा॒ला॒न् ।
नि॒रि॒ति॒ । व॒प॒ति॒ । ए॒क॒म् । अ॒तिरि॑क्तमि॒त्यति॑-रि॒क्त॒म् । या॒वन्तः॑ ।
गृ॒ह्याः॑ । स्मः॑ । तेभ्यः॑ । क॒म् । अ॒कर॑म् । प॒शूना॑म् । श॒र्म॒ । अ॒सि॒ ।
श॒र्म॒ । यज॑मानस्य । श॒र्म॒ । मे॒ । य॒च्छ॒ । ए॒कः॑ । ए॒व । रु॒द्रः॑ । न॒ ।
द्वितीयाय॑ । तस्थे॑ । आ॒खुः॑ । ते॒ । रु॒द्र॒ । प॒शुः॑ । तम् । जुषस्व॑ ।
ए॒षः॑ । ते॒ । रु॒द्र॒ । भा॒गः॑ । स॒ह । स्व॒स्रा॑ । अ॒म्बि॑कया । तम् ।
जुषस्व॑ । भेषजम्॑ । गवे॑ । अश्राय॑ । पुरुषाय॑ । भेषजम्॑ ।
अथो॑ इति॑ । अ॒स्मभ्य॑मि॒त्यस्म॑-भ्यम् । भेषजम्॑ ।
सुभेषजमि॒ति॒ सु॒ - भेषजम्॑ । 10 (50)

TS 1.8.6.2

यथा॑ऽसति॑ ।

सु॒गं॑ मे॒षाय॑ मे॒ष्या॑ अ॒वा॒ंब॑ रु॒द्र-म॑दि॒मह्य॑व दे॒वं त्र्य॑ंब॒कं ।

यथा॑ नः॒ श्रेय॑सः॒ कर॑द्यथा॒ नो व॑स्यसः॒ कर॑द्यथा॒ नः प॑शु॒मतः॒

कर॑द्यथा॒ नो व॑यवसाययात् ॥

त्र्य॑ंब॒कं य॑जामहे सु॒गन्धिं॑ पु॒ष्टि॒वर्द्ध॑नं ।

उ॒र्वारु॑कमि॒व ब॑न्ध॒नान् मृ॒त्यो मु॑क्षी॒य मा॑ऽमृतात् ॥

ए॒ष ते॑ रु॒द्र भा॒गस्तं॑ जु॒षस्व॑ ते॒नाव॑से॒न प॒रो मू॒जव॑तोऽती॒ह्य ()

व॒तत॑धन्वा पि॒नाक॑हस्तः॒ कृ॒त्ति॒वासाः॑ ॥ 11

TS 1.8.6.2 (Padam)

यथा॑ । अ॒सति॑ ॥ सु॒गमि॑ति सु-गम् । मे॒षाय॑ । मे॒ष्यै॑ । अ॒वेति॑ ।

अ॒ंब । रु॒द्रम् । अ॒दि॒महि॑ । अ॒वेति॑ । दे॒वम् ।

त्र्य॑ंब॒कमि॑ति त्रि-अ॒ंब॒कम् ॥ यथा॑ । नः॒ । श्रेय॑सः । कर॑त् । यथा॑ ।

नः॒ । व॑स्यसः । कर॑त् । यथा॑ । नः॒ । प॑शु॒मत इति॑ प॒शु - म॑तः ।

कर॑त् । यथा॑ । नः॒ । व॑यवसाययादिति॑ वि - अ॒वसा॑ययात् ॥

त्र्य॑ंब॒कमि॑ति त्रि - अ॒ंब॒कम् । य॑जामहे । सु॒गन्धि॑मिति सु-गन्धिम् ।

पु॒ष्टि॒व॒र्द्ध॑न॒मि॒ति॑ पु॒ष्टि॒-व॒र्द्ध॑नम् ॥ उ॒र्वा॒रु॒क॒म् । इ॒व । ब॒न्ध॒नात् ।
मृ॒त्योः । मु॒क्षी॒य॒ । मा । अ॒मृ॒तात् ॥ ए॒षः । ते । रु॒द्र॒ । भा॒गः । तम् ।
जु॒ष॒स्व । ते॒न । अ॒व॒से॒न॒ । प॒रः । मू॒ज॒व॒त॒ इति॑ मू॒ज॒ - व॒तः ।
अ॒ती॒ति॑ । इ॒हि () । अ॒व॒त॒त॒ध॒न्वे॒त्य॒व॒त॒त॒ - ध॒न्वा । पि॒ना॒क॒ह॒स्त॒ इति॑
पि॒ना॒क॒ - ह॒स्तः । कृ॒त्ति॒वा॒सा॒ इति॑ कृ॒त्ति॒ - वा॒साः ॥ 11 (53)

(सु॒भ॒ष॒ज॒-मि॒हि॒ त्री॒णि॒ च) (A6)

TS 1.8.7.1

ऐ॒न्द्रा॒ग्नं॑ द्वा॒द॒श॒क॒पा॒लं॑ वै॒श्व॒दे॒वं॑ च॒रु॒मि॒न्द्रा॒य॑ शु॒ना॒सी॒रा॒य॑ पु॒रो॒डा॒शं॑
द्वा॒द॒श॒क॒पा॒लं॑ वा॒य॒व्यं॑ प॒यः॑ सौ॒र्य॒मे॒क॒क॒पा॒लं॑ द्वा॒द॒श॒ग॒व॒ꣳ सी॒रं॑ दक्षि॒णा
ऽऽग्ने॒य॒-म॒ष्टा॒क॒पा॒लं॑ नि॒र्व॒प॒ति॑ रौ॒द्रं॑ गा॒वी॒धु॒कं॑ च॒रु॒मै॒न्द्रं॑ दधि॒ वा॒रु॒णं॑
य॒व॒म॒यं॑ च॒रुं॑ व॒हि॒नी॑ धे॒नु॒र्दक्षि॑णा॒ ये दे॒वाः॑ पु॒र॒स्स॒दो॒ऽग्नि॑ने॒त्रा
दक्षि॑ण॒स॒दो॒ य॒म॒ने॒त्राः॑ प॒श्चा॒त्स॒दः॑ स॒वि॒तृ॒ने॒त्रा॑ उ॒त्त॒र॒स॒दो॒
व॒रु॒ण॒ने॒त्रा॑ उ॒प॒रि॒ष॒दो॒ बृ॒ह॒स्प॒ति॑ने॒त्रा॑ र॒क्षो॒ह॒ण॒स्ते॑ नः॒ पा॒न्तु॑ ते नो॒ऽव॑न्तु
ते॒भ्यो॒ - [] 12

TS 1.8.7.1 (Padam)

ऐ॒न्द्रा॒ग्नमि॒त्यै॒न्द्र – अ॒ग्नम् । द्वा॒द॒श॒क॒पा॒लमि॒ति द्वा॒द॒श – क॒पा॒लम् ।
वै॒श्व॒दे॒वमि॒ति वै॒श्व–दे॒वम् । च॒रुम् । इ॒न्द्राय॑ । शु॒ना॒सी॒राय॑ ।
पु॒रो॒डा॒शम् । द्वा॒द॒श॒क॒पा॒लमि॒ति द्वा॒द॒श – क॒पा॒लम् ।
वा॒य॒व्यम् । प॒यः । सौ॒र्यम् । ए॒क॒क॒पा॒लमि॒त्ये॒क – क॒पा॒लम् ।
द्वा॒द॒श॒ग॒वमि॒ति द्वा॒द॒श – ग॒वम् । सी॒रम् । दक्षि॑णा । आ॒ग्ने॒यम् ।
अ॒ष्टा॒क॒पा॒लमि॒त्य॒ष्टा – क॒पा॒लम् । नि॒रि॒ति । व॒प॒ति । रौ॒द्रम् ।
गा॒वी॒धु॒कम् । च॒रुम् । ऐ॒न्द्रम् । दधि॑ । वा॒रु॒णम् ।
य॒व॒म॒यमि॒ति य॒व–म॒यम् । च॒रुम् । व॒हि॒नी॑ । धे॒नुः । दक्षि॑णा । ये ।
दे॒वाः । पु॒र॒स्स॒द इति॑ पु॒रः – स॒दः । अ॒ग्नि॒ने॒त्रा इत्य॑ग्नि – ने॒त्राः ।
दक्षि॑ण॒स॒द इति॑ दक्षि॒ण – स॒दः । य॒म॒ने॒त्रा इति॑ य॒म – ने॒त्राः ।
प॒श्चा॒त्स॒द इति॑ प॒श्चात् – स॒दः । स॒वि॒तृ॒ने॒त्रा इति॑ स॒वि॒तृ – ने॒त्राः ।
उ॒त्त॒र॒स॒द इत्यु॑त्त॒र – स॒दः । व॒रु॒ण॒ने॒त्रा इति॑ व॒रु॒ण – ने॒त्राः ।
उ॒प॒रि॒ष॒द इत्यु॑प॒रि – स॒दः । बृ॒ह॒स्प॒ति॒ने॒त्रा इति॑ बृ॒ह॒स्प॒ति – ने॒त्राः ।

र॒क्षो॒ह॒ण॒ इति॑ र॒क्षः॑ – ह॒नः॑ । ते । नः॑ । पा॒न्तु । ते । नः॑ ।

अ॒व॒न्तु । ते॒भ्यः॑ । 12 (50)

TS 1.8.7.2

नम॑स्ते॒भ्यः॑ स्वा॒हा समू॒ढं र॒क्षः॑ स॒न्दग्धं॑ र॒क्ष इ॒दम॒हं र॒क्षो॒ऽभि
सं द॒हाम्य॒ग्नये॑ र॒क्षो॒घ्ने स्वा॒हा य॒माय॑ स॒वित्रे॑ वरु॒णाय॑ बृ॒हस्प॑तये
दुव॑स्वते र॒क्षो॒घ्ने स्वा॒हा प्र॒ष्टिवा॑ही रथो दक्षि॒णा दे॒वस्य॑ त्वा स॒वितुः॑
प्र॒सवे॑ऽश्वि॒नोर्बा॒हुभ्यां॑ पू॒ष्णो ह॒स्ताभ्यां॑ र॒क्षसो॑ व॒धं जु॑होमि ह॒तं
र॒क्षो॒ऽवधि॑ष्म र॒क्षो यद्व॑स्ते तदक्षि॒णा ॥ 13

TS 1.8.7.2 (Padam)

नमः॑ । ते॒भ्यः॑ । स्वा॒हा । समू॒ढमि॒ति सं – ऊ॒ढम् । र॒क्षः॑ ।
स॒न्दग्ध॑मि॒ति सं–द॒ग्धम् । र॒क्षः॑ । इ॒दम् । अ॒हम् । र॒क्षः॑ । अ॒भि ।
समि॒ति । द॒हामि॑ । अ॒ग्नये॑ । र॒क्षो॒घ्न इति॑ र॒क्षः॑ – घ्ने । स्वा॒हा ।
य॒माय॑ । स॒वित्रे॑ । वरु॒णाय॑ । बृ॒हस्प॑तये । दुव॑स्वते । र॒क्षो॒घ्न इति॑
र॒क्षः–घ्ने॑ । स्वा॒हा । प्र॒ष्टिवा॑हीति प्र॒ष्टि–वा॒ही । रथः॑ । दक्षि॒णा ।
दे॒वस्य॑ । त्वा । स॒वितुः॑ । प्र॒सव॑ इति प्र – स॒वे । अ॒श्वि॒नोः॑ ।
बा॒हुभ्यामि॑ति बा॒हु–भ्याम् । पू॒ष्णः॑ । ह॒स्ताभ्याम् । र॒क्षसः॑ । व॒धम् ।

जुहो॑मि । ह॒तम् । रक्षः॑ । अ॒वधिष्म॑ । रक्षः॑ । यत् । वस्ते॑ । तत् ।
दक्षि॑णा ॥ 13 (45) (तेभ्यः॑-पञ्च॑चत्वारि॑ंशच्च) (A7)

TS 1.8.8.1

धा॒त्रे पु॒रोडा॑शं द्वा॒दश॑कपालं निर्व॑पत्यनु॒मत्यै॑ च॒रुं रा॒कायै॑ च॒रुं
सि॒नीवा॒ल्यै च॒रुं कु॒ह्वै च॒रुं मि॒थुनौ॑ गा॒वौ दक्षि॑णा
ऽऽग्ना॑वैष्ण॒वमेका॑दशकपालं निर्व॑पत्यैन्द्रा॑वैष्ण॒वमेका॑दशकपालं
वैष्ण॑वं त्रि॒कपालं॑ वाम॒नो व॒ही दक्षि॑णा ऽग्नी॒षोमी॑य-मेका॑दशकपालं
निर्व॑पतीन्द्रा॒सोमी॑य-मेका॑दशकपालं सौ॒म्यं च॒रुं बभ्रु॑र्दक्षि॑णा
सो॒मापौ॑ष्णं च॒रुं निर्व॑पत्यैन्द्रा॒पौष्णं॑ च॒रुं पौ॑ष्णं च॒रुं श्या॒मो दक्षि॑णा
वैश्वा॒नरं॑ द्वा॒दश॑कपालं नि () र्व॑पति॒ हिर॑ण्यं दक्षि॑णा वा॒रुणं॑ य॒वम॑यं
च॒रुमश्चो॑दक्षि॑णा । 14

TS 1.8.8.1 (Padam)

धा॒त्रे । पु॒रोडा॑शम् । द्वा॒दश॑कपालमि॒ति द्वा॒दश॑ - क॒पालम् । नि॒रिति॑ ।
व॒पति॑ । अ॒नुम॑त्या इत्यनु - म॒त्यै । च॒रुम् । रा॒कायै॑ । च॒रुम् ।
सि॒नीवा॒ल्यै । च॒रुम् । कु॒ह्वै । च॒रुम् । मि॒थुनौ॑ । गा॒वौ । दक्षि॑णा ।
आ॒ग्नावै॑ष्ण॒वमि॒त्याग्ना॑ - वैष्ण॒वम् ।

एकादशकपालमित्येकादश – कपालम् । निरिति । वपति ।

ऐन्द्रावैष्णवमित्यैन्द्रा – वैष्णवम् ।

एकादशकपालमित्येकादश – कपालम् । वैष्णवम् ।

त्रिकपालमिति त्रि – कपालम् । वामनः । वही । दक्षिणा ।

अग्नीषोमीयमित्यग्नी – सोमीयम् ।

एकादशकपालमित्येकादश – कपालम् ।

निरिति । वपति । इन्द्रासोमीयमितीन्द्रा – सोमीयम् ।

एकादशकपालमित्येकादश – कपालम् । सौम्यम् । चरुम् । बभ्रुः ।

दक्षिणा । सोमापौष्णमिति सोमा – पौष्णम् । चरुम् । निरिति ।

वपति । ऐन्द्रापौष्णमित्यैन्द्रा – पौष्णम् । चरुम् । पौष्णम् । चरुम् ।

श्यामः । दक्षिणा । वैश्वानरम् । द्वादशकपालमिति द्वादश-कपालम् ।

निरिति () । वपति । हिरण्यम् । दक्षिणा । वारुणम् ।

यवमयमिति यव – मयम् । चरुम् । अश्वः । दक्षिणा ॥ 14 (58)

(वैश्वानरं द्वादशकपालं नि-रष्टौ च) (A8)

TS 1.8.9.1

बार्॒हस्प॒त्यं च॒रुं निर्व॑पति ब्र॒ह्म॒णो गृ॒हे शि॑तिपृ॒ष्ठो दक्षि॑णैन्द्र-
मेका॑दशकपाल॒ꣳ राज॑न्यस्य गृ॒ह ऋ॒षभो दक्षि॑णाऽऽदि॒त्यं च॒रुं महि॑ष्यै
गृ॒हे धे॒नुर्दक्षि॑णानैर्ऋ॒तं च॒रुं परि॑वृ॒क्त्यै गृ॒हे कृ॒ष्णानां॑ व्री॒हीणां
नख॑निर्भिन्नं कृ॒ष्णा कू॒टा दक्षि॑णा ऽऽग्ने॒यम॑ष्टाकपाल॒ꣳ सेना॑न्यो गृ॒हे
हिर॑ण्यं दक्षि॑णा वारु॒णं दश॑कपाल॒ꣳ सू॒तस्य॑ गृ॒हे महानि॑र॒ष्टो दक्षि॑णा
मारु॑तꣳ सप्त॑कपालं ग्राम॒ण्यो गृ॒हे पृ॒श्निर्दक्षि॑णा
सावि॑त्रं द्वाद॑शकपालं – [] 15

TS 1.8.9.1 (Padam)

बार्॒हस्प॒त्यम् । च॒रुम् । निरि॑ति । व॒पति॑ । ब्र॒ह्म॒णः । गृ॒हे ।
शि॑तिपृ॒ष्ठ इति॑ शि॒ति – पृ॒ष्ठः । दक्षि॑णा । ऐन्द्र॑म् ।
एका॑दशकपालमित्येकादश-कपालम् । राज॑न्यस्य । गृ॒हे । ऋ॒षभः ।
दक्षि॑णा । आ॒दि॒त्यम् । च॒रुम् । महि॑ष्यै । गृ॒हे । धे॒नुः । दक्षि॑णा ।
नैर्ऋ॒तमि॑ति नैः-ऋ॒तम् । च॒रुम् । परि॑वृ॒क्त्या इति॑ परि-वृ॒क्त्यै॑ ।
गृ॒हे । कृ॒ष्णाना॑म् । व्री॒हीणा॑म् । नख॑निर्भिन्नमिति नख-निर्भिन्नम् ।
कृ॒ष्णा । कू॒टा । दक्षि॑णा । आ॒ग्ने॒यम् ।

पद पाठे (वाक्य सहित) – प्रथमकाण्डे – अष्टमः प्रश्नः

अ॒ष्टा॒क॒पा॒ल॒मि॒त्य॒ष्टा – क॒पा॒ल॒म् । से॒ना॒न्य॒ इति॑ से॒ना – न्यः॑ । गृ॒हे ।
हि॒र॒ण्य॒म् । दक्षि॑णा । वा॒रु॒ण॒म् । द॒श॒क॒पा॒ल॒मि॒ति द॒श–क॒पा॒ल॒म् ।
सू॒त॒स्य॑ । गृ॒हे । म॒हा॒नि॒र॒ष्ट॒ इति॑ म॒हा–नि॒र॒ष्टः ।
दक्षि॑णा । मा॒रु॒त॒म् । स॒प्त॒क॒पा॒ल॒मि॒ति स॒प्त – क॒पा॒ल॒म् ।
ग्रा॒म॒ण्य॒ इति॑ ग्रा॒म – न्यः॑ । गृ॒हे । पृ॒श्निः॑ । दक्षि॑णा । सा॒वि॒त्र॒म् ।
द्वा॒द॒श॒क॒पा॒ल॒मि॒ति द्वा॒द॒श – क॒पा॒ल॒म् । 15 (50)

TS 1.8.9.2

क्ष॒त्तु॒र्गृ॒ह॒ उप॑ध्व॒स्तो दक्षि॑णाऽऽश्वि॒नं द्वि॑क॒पा॒ल॒म् स॒ङ्ग्र॑ही॒तु॒र्गृ॒हे
स॒वा॒त्यौ दक्षि॑णा पौ॒ष्णं च॒रुं भा॑गदु॒घस्य॑ गृ॒हे श्या॒मो दक्षि॑णा रौ॒द्रं
गा॒वी॒धु॒कं च॒रु॒म॒क्षा॒वा॒प॒स्य गृ॒हे श॒ब॒ल उ॒द्वा॒रो दक्षि॑णेन्द्रा॒य सु॒त्रा॒म्णे
पु॒रो॒डा॒श–मे॒का॒द॒श॒क॒पा॒लं प्र॒ति निर्व॑प॒तीन्द्रा॒याऽहो॑मु॒चे ऽयं॑ नो॒ राजा॑
वृ॒त्र॒हा राजा॑ भू॒त्वा वृ॒त्रं व॑द्ध्यान् मै॒त्रा॒बा॒र्ह॒स्प॒त्यं भ॑वति श्वे॒तायै॑
श्वे॒त॒व॒त्सा॒यै दु॒ग्धे स्व॑यंमूर्ते॑ स्व॑यंमथि॒त आ॒ज्य आ॑श्व॒त्थे – [] 16

TS 1.8.9.2 (Padam)

क्ष॒त्तुः । गृ॒हे । उ॒प॒ध्व॒स्त इत्यु॑प – ध्व॒स्तः । दक्षि॑णा । आ॒श्वि॒न॒म् ।
द्वि॒क॒पा॒ल॒मि॒ति द्वि – क॒पा॒ल॒म् । स॒ङ्ग्र॑ही॒तु॒रिति॑ सं–ग्र॒ही॒तुः । गृ॒हे ।

स॒वा॒त्या॒वि॒ति॒ स – वा॒त्यौ॑ । दक्षि॑णा । पौ॒ष्ण॒म् । च॒रु॒म् ।
भा॒ग॒दु॒घ॒स्ये॑ति॒ भा॒ग – दु॒घ॒स्य॑ । गृ॒हे । श्या॒मः॑ । दक्षि॑णा । रौ॒द्र॒म् ।
गा॒वी॒धु॒क॒म् । च॒रु॒म् । अ॒क्षा॒वा॒प॒स्ये॑त्यक्ष – आ॒वा॒प॒स्य॑ । गृ॒हे ।
श॒ब॒लः॑ । उ॒द्वा॒र इ॒त्यु॒त् – वा॒रः॑ । दक्षि॑णा । इन्द्रा॑य । सु॒त्रा॒ण इति॑
सु – त्रा॒णै॑ । पु॒रो॒डा॒श॒म् । ए॒का॒द॒श॒क॒पा॒ल॒मि॒त्ये॒का॒द॒श – क॒पा॒ल॒म् ।
प्र॒ति॑ । नि॒रि॒ति॑ । व॒प॒ति॑ । इन्द्रा॑य । अ॒हो॒मु॒च इ॒त्य॒हः॑ – मु॒चे॑ ।
अ॒य॒म् । नः॑ । रा॒जा॑ । वृ॒त्र॒हे॒ति॑ वृ॒त्र॒हा॑ । रा॒जा॑ । भू॒त्वा । वृ॒त्र॒म् ।
व॒द्ध्य॒त् । मै॒त्रा॒बा॒र्ह॒स्प॒त्य॒मि॒ति॑ मै॒त्रा॒बा॒र्ह॒स्प॒त्य॒म् । भ॒व॒ति॑ ।
श्वे॒ता॒यै॑ । श्वे॒त॒व॒त्स॒या॒ इति॑ श्वे॒त॒व॒त्स॒या॒यै॑ । दु॒ग्धे॑ ।
स्व॒यं॒मूर्त॑ इति॒ स्व॒यं॒मूर्ते॑ । स्व॒यं॒म॒थि॒त इति॑ स्व॒यं – म॒थि॒ते॑ ।
आ॒ज्ये॑ । आ॒श्व॒त्थे॑ । 16 (50)

TS 1.8.9.3

पा॒त्रे च॒तु॒स्स॒क्तौ॑ स्व॒यं॒म॒व॒प॒न्ना॒यै॑ शा॒खा॒यै॑ क॒र्णा॑श्चा॒क॒र्णा॑श्च
तण्डु॒लान् वि चि॒नु॒या॒द् ये क॒र्णाः॑ स प॒य॒सि॑ बा॒र्ह॒स्प॒त्यो॑ येऽक॒र्णाः॑

स आज्ये॑ मै॒त्रः स्वयं॑कृ॒ता वेदि॑र्भवति स्वयन्दि॒नं ब॒र्हिः

स्वयं॑कृ॒त इ॒ध्मः सै॒व श्वे॒ता श्वे॒तव॑थ्सा दक्षि॒णा ॥ 17

TS 1.8.9.3 (Padam)

पात्रे॑ । चतु॑स्स॒क्तावि॒ति चतुः॑ – स॒क्तौ । स्वय॑मवप॒न्नाया॒ इति॑

स्वयं॑-अ॒वप॒न्नायै॑ । शा॒खायै॑ । क॒र्णान् । च । अ॒कर्णान् । च ।

तण्डु॑लान् । वी॒ति । चि॒नुया॑त् । ये । क॒र्णाः । सः । प॒यसि॑ ।

बा॒र्हस्प॑त्यः । ये । अ॒कर्णाः । सः । आ॒ज्ये॑ । मै॒त्रः ।

स्वयं॑कृ॒तेति॑ स्वय॑म् – कृ॒ता । वेदिः॑ । भ॒वति॑ । स्वय॑न्दि॒नमि॒ति

स्वयं॑ – दि॒नम् । ब॒र्हिः । स्वयं॑कृ॒त इति॑ स्वयं॑ – कृ॒तः । इ॒ध्मः ।

सा । ए॒व । श्वे॒ता । श्वे॒तव॑थ्सेति॑ श्वे॒त – व॒थ्सा । दक्षि॒णा ॥ 17 (33)

(सा॒वि॒त्रं द्वा॒दश॑क॒पाल-मा॒श्व॒त्थे त्र॒यस्त्रि॑ंश॒च्च) (A9)

TS 1.8.10.1

अ॒ग्नये॑ गृ॒हप॑तये पु॒रोडा॑शम॒ष्टाक॑पालं निर्व॑पति कृ॒ष्णानां॑ व्री॒हीणाञ्

सो॒माय॑ व॒नस्प॑तये श्या॒माकं॑ च॒रुञ् स॒वि॒त्रे स॒त्यप्र॑सवाय पु॒रोडा॑शं

द्वा॒दश॑क॒पाल-मा॒शूनां॑ व्री॒हीणाञ् रु॒द्राय॑ प॒शुप॑तये गा॒वीधु॑कं च॒रुं

बृ॒हस्प॑तये वा॒चस्प॑तये नै॒वारं॑ च॒रुमि॑न्द्राय ज्ये॒ष्ठाय॑ पु॒रोडा॑श-

मे॒का॒द॒श॒क॒पा॒लं॑ म॒हा॒व्री॒ही॒णां॑ मि॒त्राय॑ स॒त्यायाऽऽम्ब॑नां चरुं
वरु॑णाय ध॒र्म॒प॒तये॑ यव॒मयं॑ चरु॒ऽ स॒वि॒ता त्वा॑ प्रस॒वाना॑
सु॒व॒ताम॒ग्नि॑ गृ॒ह॒प॒तीना॑ऽ सोमो वन॒स्प॒तीना॑ऽ रु॒द्रः प॒शूनां॑ – [] 18

TS 1.8.10.1 (Padam)

अ॒ग्नये॑ । गृ॒ह॒प॒तय॑ इति गृ॒ह – प॒तये॑ । पु॒रो॒डा॒शम्॑ ।
अ॒ष्टा॒क॒पा॒ल॒मि॒त्य॒ष्टा॑ – क॒पा॒लम्॑ । नि॒रि॒ति॑ । व॒प॒ति॑ । कृ॒ष्णा॒नाम्॑ ।
व्री॒ही॒णाम्॑ । सो॒माय॑ । वन॒स्प॒तये॑ । श्या॒मा॒कम्॑ । च॒रुम्॑ । स॒वि॒त्रे॑ ।
स॒त्य॒प्र॒स॒वाये॑ति स॒त्य – प्र॒स॒वाय॑ । पु॒रो॒डा॒शम्॑ । द्वा॒द॒श॒क॒पा॒ल॒मि॒ति॑
द्वा॒द॒श – क॒पा॒लम्॑ । आ॒शू॒नाम्॑ । व्री॒ही॒णाम्॑ । रु॒द्राय॑ । प॒शु॒प॒तय॑ इति॑
प॒शु – प॒तये॑ । गा॒वी॒धु॒कम्॑ । च॒रुम्॑ । बृ॒ह॒स्प॒तये॑ । वा॒चः॑ । प॒तये॑ ।
नै॒वा॒रम्॑ । च॒रुम्॑ । इ॒न्द्राय॑ । ज्ये॒ष्ठाय॑ । पु॒रो॒डा॒शम्॑ ।
ए॒का॒द॒श॒क॒पा॒ल॒मि॒त्ये॒का॒द॒श॑ – क॒पा॒लम्॑ ।
म॒हा॒व्री॒ही॒णामि॑ति म॒हा–व्री॒ही॒णाम्॑ । मि॒त्राय॑ । स॒त्याय॑ । आ॒म्ब॑नाम् ।
च॒रुम्॑ । वरु॑णाय । ध॒र्म॒प॒तय॑ इति ध॒र्म – प॒तये॑ ।
यव॒मय॑मिति॑ यव – म॒यम्॑ । च॒रुम्॑ । स॒वि॒ता । त्वा॑ ।

प्र॒स॒वा॒ना॒मि॒ति॑ प्र – स॒वा॒ना॒म् । सु॒व॒ता॒म् । अ॒ग्निः । गृ॒ह॒प॒ती॒ना॒मि॒ति॑
गृ॒ह – प॒ती॒ना॒म् । सोमः । व॒न॒स्प॒ती॒ना॒म् । रु॒द्रः । प॒शू॒ना॒म् । 18 (50)

TS 1.8.10.2

बृ॒ह॒स्प॒ति॑ वा॒चा॒मिन्द्रो॑ ज्ये॒ष्ठानां॑ मि॒त्रः स॒त्यानां॑ व॒रु॒णो
ध॒र्म॒प॒ती॒नां॑ ये दे॒वा दे॒व॒सु॒वः स्थ॑ त इ॒म-मा॑मु॒ष्या॒य॒ण-म॑न॒मि॒त्राय॑
सु॒व॒ध्वं म॑ह॒ते क्ष॒त्राय॑ म॒ह॒त आ॑धि॒प॒त्या॒य म॑ह॒ते जा॑न॒रा॒ज्या॒यैष वो॑
भ॒र॒ता रा॒जा सो॒मोऽस्मा॑कं ब्रा॒ह्म॒णा॒नां राजा॑ प्र॒ति॒त्य॒न्ना॒म
रा॒ज्य-म॑धा॒यि स्वां॑ त॒नु॒वं व॒रु॒णो अ॑शि॒श्रे॒च्छु॒चैर्मि॒त्रस्य॑
व॒त्या अ॑भू॒मा॒म॒न्म॒हि म॑ह॒त ऋ॒तस्य॑ ना॒म स॒र्वे व्रा॒ता ()
व॒रु॒णस्या॑भू॒वन् वि॑ मि॒त्र ए॒वै-र॑रा॒ति-म॑ता॒री॒द॒सू॒षु॒दन्त॑ य॒ज्ञिया॑ ऋ॒तेन॑
व्यु॒ त्रि॒तो ज॑रि॒माणं॑ न आ॒न॒ड् वि॒ष्णोः क्र॒मोऽसि॑ वि॒ष्णोः॑

क्रा॒न्त॒म॒सि वि॒ष्णोर्वि॒क्रा॒न्त-म॑सि ॥ 19

TS 1.8.10.2 (Padam)

बृ॒ह॒स्प॒तिः । वा॒च॒म् । इन्द्रः । ज्ये॒ष्ठाना॑म् । मि॒त्रः । स॒त्याना॑म् ।
व॒रु॒णः । ध॒र्म॒प॒ती॒ना॒मि॒ति॑ ध॒र्म – प॒ती॒ना॒म् । ये । दे॒वाः । दे॒व॒सु॒व
इति॑ दे॒व – सु॒वः । स्थ॑ । ते । इ॒मम् । आ॒मु॒ष्या॒य॒णम् । अ॒न॒मि॒त्राय॑ ।

सु॒व॒ध्व॒म् । म॒ह॒ते । क्ष॒त्राय॑ । म॒ह॒ते । आ॒धि॒प॒त्या॒येत्या॒धि॒-प॒त्या॒य ।
म॒ह॒ते । जा॒न॒रा॒ज्या॒येति॑ जा॒न॒-रा॒ज्या॒य । ए॒षः । वः । भ॒र॒ताः । रा॒जा ।
सोमः॑ । अ॒स्माक॑म् । ब्रा॒ह्म॒णा॒नाम् । रा॒जा । प्र॒ती॒ति । त्यत् । ना॒म ।
रा॒ज्य॒म् । अ॒धा॒यि । स्वा॒म् । त॒नु॒व॒म् । व॒रु॒णः । अ॒शि॒श्रे॒त् । शु॒चैः ।
मि॒त्र॒स्य । व॒त्याः । अ॒भू॒म् । अ॒म॒न्म॒हि । म॒ह॒तः । ऋ॒त॒स्य । ना॒म ।
सर्वे॑ । व्रा॒ताः () । व॒रु॒ण॒स्य । अ॒भू॒वन् । वी॒ति । मि॒त्रः । ए॒वैः ।
अ॒रा॒ति॒म् । अ॒ता॒री॒त् । अ॒सू॒षु॒दन्त॑ । य॒ज्ञि॒याः । ऋ॒ते॒न । वी॒ति । उ ।
त्रि॒तः । ज॒रि॒मा॒ण॒म् । नः । आ॒न॒ट् । वि॒ष्णोः । क्र॒मः । अ॒सि ।
वि॒ष्णोः । क्रा॒न्त॒म् । अ॒सि । वि॒ष्णोः । वि॒क्रा॒न्त॒मि॒ति वि - क्रा॒न्त॒म् ।
अ॒सि ॥ 19 (75) (प॒शूनां॑-व्रा॒ताः-प॒ञ्च॒वि॒ंश॒तिश्च॑) (A10)

TS 1.8.11.1

अ॒र्थे॒तः । स्था॒ऽपां॑ प॒ति॒र॒सि । वृ॒षा॒ऽस्य॑ूर्मि॑ वृ॒ष॒से॒नो॒ऽसि॑ व्र॒ज॒क्षि॒तः । स्थ
म॒रु॒ता॒मो॒जः । स्थ । सूर्य॑व॒र्च॒सः । स्थ । सूर्य॑त्व॒च॒सः । स्थ । मा॒न्दाः । स्थ
वा॒शाः । स्थ । श॒क्व॒रीः । स्थ । वि॒श्व॒भृ॒तः । स्थ । ज॒न॒भृ॒तः ।
स्था॒ऽग्ने॒स्ते॒ज॒स्याः॑ । स्था॒ऽपा॒मो॒ष॒धी॒ना॒ँ र॒सः । स्था॒ऽपो

दे॒वीर्मधु॑मती-रगृ॒ह्णन्नूर्ज॑स्वती राज॒सूयाय॑ चि॒तानाः॑ ।

याभि॑ मि॒त्रावरु॑णाव-भ्य॑षिञ्चन्. याभि॑-रिन्द्र-मन॑यन्नत्य () रा॒तीः ॥

राष्ट्र॑दाः स्थ राष्ट्रं॑ दत्त॒ स्वाहा॑ राष्ट्र॑दाः स्थ राष्ट्र॑ममुष्मै दत्त ॥ 20

TS 1.8.11.1 (Padam)

अ॒र्थेत॒ इत्य॑र्थ-इतः॑ । स्थ । अ॒पाम् । पतिः॑ । अ॒सि । वृषा॑ ॥

अ॒सि । ऊ॒र्मिः । वृष॑सेन इति वृष-सेनः॑ । अ॒सि ।

व्रज॑क्षित इति व्रज-क्षितः॑ । स्थ । म॒रुता॑म् । ओजः॑ । स्थ ।

सूर्य॑वर्चस इति सूर्य - वर्चसः॑ । स्थ । सूर्य॑त्वचस इति

सूर्य - त्वचसः॑ । स्थ । मा॒न्दाः । स्थ । वा॒शाः । स्थ । शक्व॑रीः ।

स्थ । वि॒श्वभृ॑त इति विश्व - भृ॒तः । स्थ । ज॒नभृ॑त इति

ज॒न-भृ॑तः । स्थ । अ॒ग्नेः । तेज॑स्याः । स्थ । अ॒पाम् ।

ओष॑धीनाम् । रसः॑ । स्थ । अ॒पः ।

दे॒वीः । मधु॑मतीरिति मधु - मतीः॑ । अ॒गृह्ण॑न् । ऊ॒र्जस्व॑तीः ।

राज॑सूयायेति राज - सूयाय । चि॒तानाः॑ ॥ याभिः॑ । मि॒त्रावरु॑णाविति

मि॒त्रा-वरु॑णौ । अ॒भ्यषि॑ञ्चन्नित्यभि-अ॒सिञ्च॑न् । याभिः॑ । इन्द्र॑म् ।

अ॒न॒य॒न् । अ॒ती॒ति॒ () । अ॒रा॒तीः ॥ रा॒ष्ट्र॒दा इति॑ रा॒ष्ट्र-दाः । स्थ॒ ।
रा॒ष्ट्र॒म् । द॒त्त॒ । स्वा॒हा॒ । रा॒ष्ट्र॒दा इति॑ रा॒ष्ट्र - दाः । स्थ॒ । रा॒ष्ट्र॒म् ।
अ॒मु॒ष्मै॑ । द॒त्त॒ ॥ 20 (61) (अ॒त्ये-का॒दश॑ च) (A11)

TS 1.8.12.1

दे॒वी॒रा॒पः॑ सं म॒धु॒म॒ती॒र्म॒धु॒म॒ती॒भिः॑ सृ॒ज्य॒द्ध्वं॑ म॒हि॒ वर्चः॑ क्ष॒त्रि॒या॒य
व॒न्वा॒ना अ॒ना॒धृ॒ष्टाः॑ सी॒द॒तो॒र्ज॒स्व॒ती॒र्म॒हि॒ वर्चः॑ क्ष॒त्रि॒या॒य
द॒ध॒ती॒र॒नि॒भृ॒ष्ट॒म॒सि॒ वा॒चो॑ ब॒न्धु॒स्त॒पो॒जाः॑ सोम॑स्य दा॒त्र॒म॒सि॒शु॒क्रा वः॑
शु॒क्रे॒णो॒त्पु॒ना॒मि॒ च॒न्द्रा॒श्च॒न्द्रे॒णामृ॒ता अ॒मृ॒ते॒न॒ स्वा॒हा॒ रा॒ज॒सू॒या॒य
चि॒ता॒नाः ॥

स॒ध॒मा॒दौ॑ द्यु॒म्नि॒नी॒रूर्ज॑ ए॒ता अ॒नि॒भृ॒ष्टा अ॒प॒स्यु॒वो व॒सानः॑ ।
प॒स्त्या॒सु च॒क्रे वरु॑णः स॒ध॒स्थ॒म॒पां॑ शि॒शु - [] 21

TS 1.8.12.1 (Padam)

दे॒वीः॑ । आ॒पः॑ । स॒मि॒ति॒ । म॒धु॒म॒ती॒रि॒ति॒ म॒धु- म॒तीः॑ । म॒धु॒म॒ती॒भि॒रि॒ति॒
म॒धु-म॒ती॒भिः॑ । सृ॒ज्य॒द्ध्व॒म् । म॒हि॒ । वर्चः॑ । क्ष॒त्रि॒या॒य । व॒न्वा॒नाः ।
अ॒ना॒धृ॒ष्टा इत्य॑ना-धृ॒ष्टाः॑ । सी॒द॒त॒ । ऊ॒र्ज॒स्व॒तीः॑ । म॒हि॒ । वर्चः॑ ।
क्ष॒त्रि॒या॒य । द॒ध॒तीः॑ । अ॒नि॒भृ॒ष्ट॒मि॒त्य॒नि-भृ॒ष्ट॒म् । अ॒सि॒ । वा॒चः॑ ।

बन्धुः । तपो॒जा इति॑ तपः – जाः । सोम॑स्य । दा॒त्रम् । अ॒सि ।
शु॒क्राः । वः । शु॒क्रेण॑ । उ॒दिति॑ । पु॒नामि॑ । च॒न्द्राः । च॒न्द्रेण॑ ।
अ॒मृताः॑ । अ॒मृतेन॑ । स्वाहा॑ । रा॒जसू॒यायेति॑ राज – सू॒याय॑ ।
चि॒तानाः॑ ॥ स॒धमा॒द इति॑ सध-मा॒दः । द्यु॒म्निनीः॑ । ऊ॒र्जः । ए॒ताः ।
अ॒निभृ॑ष्टा इत्य॒नि-भृ॑ष्टाः । अ॒पस्यु॑वः । व॒सानः॑ ॥ प॒स्त्यासु॑ । च॒क्रे ।
व॒रुणः॑ । स॒धस्थ॑मिति स॒ध – स्थ॑म् । अ॒पाम् । शि॒शुः । 21 (50)

TS 1.8.12.2

मा॒तृ॒तमा॑स्वन्तः ॥
क्ष॒त्रस्यो॑ल्बम॒सि क्ष॒त्रस्य॑ यो॒नि॒रस्या॑वि॒न्नो अ॒ग्नि॒र्गृह॑पति॒रावि॑न्न इन्द्रो॑
वृ॒द्धश्र॑वा आ॒विन्नः॑ पू॒षा वि॒श्ववे॑दा आ॒विन्नौ॑ मि॒त्राव॑रुणा
वृ॒तावृ॑धा॒वावि॑न्ने द्या॒वापृ॑थि॒वी धृ॒तव्र॑ते आ॒विन्ना
दे॒व्यदि॑ति वि॒श्वरू॑प्यावि॒न्नो ऽय॑मसा॒वामु॑ष्याय॒णो॑ऽस्यां वि॒श्यस्मि॑न्
रा॒ष्ट्रे म॑ह॒ते क्ष॒त्राय॑ म॒हत॑ आ॒धिप॑त्याय म॒हते॑ जा॒नरा॑ज्यायैष वो॑ भ॒रता॑
रा॒जा सो॒मोऽस्मा॑कं ब्रा॒ह्मणा॑ना॒ं राजे॑न्द्रस्य – [] 22

TS 1.8.12.2 (Padam)

मा॒तृ॒त॒मा॒स्वि॒ति मा॒तृ – त॒मा॒सु । अ॒न्तः ॥ क्ष॒त्र॒स्य॑ । उ॒ल्ब॑म् । अ॒सि॒ ।
क्ष॒त्र॒स्य॑ । यो॒निः । अ॒सि॒ । आ॒वि॒न्नः । अ॒ग्निः । गृ॒ह॒प॒ति॒रि॒ति
गृ॒ह–प॒तिः । आ॒वि॒न्नः । इ॒न्द्रः । वृ॒द्ध॒श्र॒वा इति॑ वृ॒द्ध–श्र॒वाः ।
आ॒वि॒न्नः । पू॒षा । वि॒श्व॒वे॒दा इति॑ वि॒श्व – वे॒दाः ।
आ॒वि॒न्नौ । मि॒त्रा॒व॒रु॒णा॒वि॒ति मि॒त्रा – व॒रु॒णौ । ऋ॒ता॒वृ॒धा॒वि॒त्यृ॒त–वृ॒धौ ।
आ॒वि॒न्ने इति॑ । द्या॒वा॒पृ॒थि॒वी इति॑ द्या॒वा – पृ॒थि॒वी । धृ॒त॒व्र॒ते इति॑
धृ॒त – व्र॒ते । आ॒वि॒न्ना । दे॒वी । अ॒दि॒तिः । वि॒श्व॒रू॒पी॒ति वि॒श्व–रू॒पी ।
आ॒वि॒न्नः । अ॒यम् । अ॒सौ । आ॒मु॒ष्या॒य॒णः । अ॒स्याम् । वि॒शि ।
अ॒स्मिन् । रा॒ष्ट्रे । म॒ह॒ते । क्ष॒त्रा॒य । म॒ह॒ते ।
आ॒धि॒प॒त्या॒ये॒त्या॒धि–प॒त्या॒य । म॒ह॒ते । जा॒न॒रा॒ज्या॒ये॒ति जा॒न–रा॒ज्या॒य ।
ए॒षः । वः । भ॒र॒ताः । रा॒जा । सो॒मः । अ॒स्मा॒कम् । ब्रा॒ह्म॒णा॒नाम् ।
रा॒जा । इ॒न्द्र॒स्य॑ । 22 (50)

TS 1.8.12.3

व॒ज्रो॒ऽसि॑ वा॒र्त्र॒घ्न॒स्त्वया॑ यं वृ॒त्रं वृ॒द्ध्या॑च्छ॒त्रु॒बा॒ध॒नाः स्थ॒पा॒त मा॑
प्र॒त्य॒ज्चं पा॒त मा॑ ति॒र्य॒ज्च॒म॒न्व॒ज्चं मा॑ पा॒त दि॒ग्भ्यो॑ मा॑ पा॒त वि॒श्वा॒भ्यो॑

मा॒ ना॒ष्ट्रा॒भ्यः॑ पा॒त॒ हिर॑ण्यवर्णा-वु॒षसां॑ वि॒रोके॑ऽयस्स्थू॒णा-वु॒दितौ॑
सूर्य॑स्याऽऽ रो॒हतं॑ वरु॒ण मि॒त्र॒ गर्तं॑ ततश्चक्षा॒थाम॑दि॒तिं दि॒तिं च॑ ॥ 23

TS 1.8.12.3 (Padam)

वज्रः॑ । अ॒सि॒ । वा॒र्त्र॒घ्न इति॑ वा॒र्त्र॒ - घ्नः॑ । त्वया॑ । अ॒यम् । वृ॒त्रम् ।
व॒द्ध्यात् । श॒त्रु॒बा॒धना॑ इति॑ श॒त्रु-बा॒धनाः॑ । स्थ॒ । पा॒त॒ । मा॒ ।
प्र॒त्य॒ञ्चम्॑ । पा॒त॒ । मा॒ । ति॒र्य॒ञ्चम्॑ । अ॒न्व॒ञ्चम्॑ । मा॒ । पा॒त॒ ।
दि॒ग्भ्य इति॑ दिक्-भ्यः॑ । मा॒ । पा॒त॒ । वि॒श्वा॒भ्यः॑ । मा॒ । ना॒ष्ट्रा॒भ्यः॑ ।
पा॒त॒ । हि॒र॒ण्यव॑र्णा॒विति॑ हि॒र॒ण्य॒ - वर्णौ॑ । उ॒ष॒साम् । वि॒रोक॑ इति॑
वि॒ - रो॒के । अ॒यस्स्थू॒णावि॑ययः॑ - स्थू॒णौ । उ॒दि॒ता॒वि॒युत् - इ॒तौ ।
सूर्य॑स्य । ए॒ति॒ । रो॒ह॒तम् । वरु॒ण॒ । मि॒त्र॒ । गर्त॑म् । ततः॑ ।
चक्षा॒थाम् । अ॒दि॒तिम् । दि॒तिम् । च॒ ॥ 23 (41)

(शि॒शु-रि॒न्द्रस्यै-क॑च॒त्वारि॑ञ्श॒च्च) (A12)

TS 1.8.13.1

स॒मि॒ध॒मा ति॑ष्ठ गा॒य॒त्री त्वा॒ छ॒न्द॒साम॑वतु त्रि॒वृ॒थ्स्तो॒मो रथ॑न्तरञ्
सा॒मा॒ग्नि॒र्दे॒वता॑ ब्र॒ह्म॒ द्र॒वि॒णमु॒ग्रामा॑ ति॑ष्ठ त्रि॒ष्टुप् त्वा॒ छ॒न्द॒साम॑वतु
पञ्च॒द॒श॒स्तो॒मो बृ॒ह॒थ् सा॒मेन्द्रो॑ दे॒वता॑ क्ष॒त्रं द्र॒वि॒णं वि॒राज॑मा ति॑ष्ठ

ज॒गती॑ त्वा॒ छन्द॑सामवतु सप्तदशस्स्तोमो॑ वैरूप॑ साम॒ मरुतो॑
दे॒वता॑ वि॒ड् द्रवि॑ण-मु॒दीची॑मा-तिष्ठानुष्टुप् त्वा - [] 24

TS 1.8.13.1 (Padam)

स॒मिध॒मिति॑ सं-इ॒धम् । ए॒ति । तिष्ठ॑ । गा॒यत्री॑ । त्वा । छन्द॑साम् ।
अ॒वतु॑ । त्रि॒वृदि॑ति त्रि-वृत् । स्तोमः॑ । रथ॑न्तरमिति रथं-तरम् ।
साम॑ । अ॒ग्निः । दे॒वता॑ । ब्र॒ह्म । द्रवि॑णम् । उ॒ग्राम् । ए॒ति । तिष्ठ॑ ।
त्रि॒ष्टुप् । त्वा । छन्द॑साम् । अ॒वतु॑ । पञ्च॑दश इति पञ्च-दशः ।
स्तोमः॑ । बृ॒हत् । साम॑ । इन्द्रः॑ । दे॒वता॑ । क्ष॒त्रम् । द्रवि॑णम् ।
वि॒राज॒मिति॑ वि-राजम् । ए॒ति । तिष्ठ॑ । ज॒गती॑ । त्वा । छन्द॑साम् ।
अ॒वतु॑ । सप्त॑दश इति सप्त-दशः । स्तोमः॑ । वैरूप॑म् । साम॑ ।
म॒रुतः॑ । दे॒वता॑ । वि॒ट् । द्रवि॑णम् । उ॒दीची॑म् । ए॒ति । तिष्ठ॑ ।
अ॒नुष्टु॑बित्यनु - स्तुप् । त्वा । 24 (50)

TS 1.8.13.2

छन्द॑सा-मवत्वेकवि॒ंशः॑ स्तोमो॑ वैराज॑ साम॒ मित्रा॑वरुणौ
दे॒वता॑ ब॒लं द्रवि॑ण-मूर्द्ध॒वामा॑ तिष्ठ प॒ङ्क्ति॑स्त्वा छन्द॑सामवतु
त्रि॒णव॑त्रयस्त्रि॒ंशौ॑ स्तोमो॑ शा॒क्वरै॑वते साम॒नी बृ॒हस्प॑तिर्दे॒वता॑ वर्चो॑

द्र॒वि॒ण॒-मी॒दृ॒ङ् चा॒न्या॒दृ॒ङ् चै॒ता॒दृ॒ङ् च॒ प्र॒ति॒दृ॒ङ् च॒ मि॒तश्च॒ सं॒मि॒तश्च॒
स॒भ॒राः ।

शु॒क्र॒ज्यो॒तिश्च॒ चि॒त्र॒ज्यो॒तिश्च॒ स॒त्य॒ज्यो॒तिश्च॒ ज्यो॒ति॒ष्मा॒ञ्च॒

स॒त्यश्च॒र्त॒पा॒श्वा - [] 25

TS 1.8.13.2 (Padam)

छ॒न्द॒साम् । अ॒व॒तु॒ । ए॒क॒वि॒ं॒श इ॒त्ये॒क-वि॒ं॒शः । स्तो॒मः॑ ।
वै॒रा॒जम् । सा॒म । मि॒त्रा॒व॒रु॒णा॒वि॒ति॒ मि॒त्रा - व॒रु॒णौ । दे॒वता॑ । ब॒लम्॑ ।
द्र॒वि॒णम् । ऊ॒र्ध्वा॒म् । ए॒ति॒ । ति॒ष्ठ॒ । प॒ङ्क्तिः॑ । त्वा॒ । छ॒न्द॒साम् ।
अ॒व॒तु॒ । त्रि॒ण॒व॒त्र॒य॒स्त्रि॒ं॒शा॒वि॒ति॒ त्रि॒ण॒व - त्र॒य॒स्त्रि॒ं॒शौ । स्तो॒मौ॑ ।
शा॒क्व॒र॒रै॒व॒ते इ॒ति॒ शा॒क्व॒र-रै॒व॒ते । सा॒म॒नी इ॒ति॒ । बृ॒ह॒स्प॒तिः॑ ।
दे॒वता॑ । वर्चः॑ । द्र॒वि॒णम् । ई॒दृ॒ङ् । च॒ । अ॒न्या॒दृ॒ङ् । च॒ । ए॒ता॒दृ॒ङ् ।
च॒ । प्र॒ति॒दृ॒ङ् इ॒ति॒ प्र॒ति - दृ॒ङ् । च॒ । मि॒तः॑ । च॒ । सं॒मि॒त इ॒ति॒
सं - मि॒तः॑ । च॒ । स॒भ॒रा इ॒ति॒ स - भ॒राः॑ ॥ शु॒क्र॒ज्यो॒ति॒रि॒ति॒
शु॒क्र - ज्यो॒तिः॑ । च॒ । चि॒त्र॒ज्यो॒ति॒रि॒ति॒ चि॒त्र - ज्यो॒तिः॑ । च॒ ।

स॒त्य॒ज्यो॒ति॒रिति॑ स॒त्य – ज्यो॒तिः । च । ज्यो॒तिष्मा॑न् । च । स॒त्यः ।

च । ऋ॒त॒पा इ॒त्यृत॑ – पाः । च । 25 (50)

TS 1.8.13.3

अ॒त्य॒हाः ।

अ॒ग्नये॑ स्वा॒हा सो॒माय॑ स्वा॒हा स॒वित्रे॑ स्वा॒हा स॒रस्व॑त्यै स्वा॒हा पू॒ष्णे
स्वा॒हा बृ॒हस्प॑तये स्वा॒हेन्द्रा॑य स्वा॒हा घो॑षाय स्वा॒हा इ॒लोका॑य स्वा॒हा
ऽ॒ञ्शाय॑ स्वा॒हा भ॒गाय॑ स्वा॒हा क्षे॒त्रस्य॑ प॒तये॑ स्वा॒हा
पृ॒थिव्यै॑ स्वा॒हा अ॒न्तरि॑क्षाय स्वा॒हा दि॒वे स्वा॒हा सू॒र्याय॑ स्वा॒हा
च॒न्द्रम॑से स्वा॒हा नक्ष॑त्रेभ्यः स्वा॒हा ऽद्भ्यः॑ स्वा॒हौष॑धीभ्यः स्वा॒हा
व॒नस्प॑तिभ्यः स्वा॒हा च॒राच॑रेभ्यः स्वा॒हा प॒रिप्ल॑वेभ्यः स्वा॒हा
स॒रीसृ॑पेभ्यः स्वा॒हा ॥ 26

TS 1.8.13.3 (Padam)

अ॒त्य॒हा इ॒त्यति॑-अ॒हाः ॥ अ॒ग्नये॑ । स्वा॒हा । सो॒माय॑ । स्वा॒हा ।
स॒वित्रे॑ । स्वा॒हा । स॒रस्व॑त्यै । स्वा॒हा । पू॒ष्णे । स्वा॒हा । बृ॒हस्प॑तये ।
स्वा॒हा । इ॒न्द्राय॑ । स्वा॒हा । घो॑षाय । स्वा॒हा । इ॒लोका॑य । स्वा॒हा ।
अ॒ञ्शाय॑ । स्वा॒हा । भ॒गाय॑ । स्वा॒हा । क्षे॒त्रस्य॑ । प॒तये॑ । स्वा॒हा ।

पृ॒थि॒व्यै । स्वा॒हा ॥ अ॒न्त॒रि॒क्षाय॑ । स्वा॒हा ॥ दि॒वे । स्वा॒हा ॥ सू॒र्या॒य ।
स्वा॒हा ॥ च॒न्द्र॒म॒से । स्वा॒हा ॥ नक्ष॑त्रेभ्यः । स्वा॒हा ॥
अ॒द्भ्य॑ इ॒त्यत्-भ्यः॑ । स्वा॒हा ॥ ओष॑धीभ्य इ॒त्योष॑धि-भ्यः । स्वा॒हा ॥
व॒न॒स्प॒ति॒भ्य इति॑ व॒न॒स्प॒ति॒-भ्यः॑ । स्वा॒हा ॥ च॒रा॒च॒रे॒भ्यः॑ । स्वा॒हा ॥
प॒रि॒प्ल॒वे॒भ्य इति॑ प॒रि - प्ल॒वे॒भ्यः॑ । स्वा॒हा ॥ स॒री॒सृ॒पे॒भ्यः॑ ।
स्वा॒हा () ॥ 26 (50)

(अ॒नु॒ष्टु॒प्त्वं-त॒र्पाश्च॑ - स॒री॒सृ॒पे॒भ्यः॑ स्वा॒हा) (A13)

TS 1.8.14.1

सोम॑स्य त्वि॒षिर॑सि तवे॒व मे॒ त्वि॒षि॒र्भूया॑-द॒मृत॑मसि मृ॒त्योर्मा॑ पाहि
दि॒द्योन्मा॑ पा॒ह्यवे॑ष्टा द॒न्द॒शू॒का नि॒रस्तं॑ नमु॒चेः शि॒रः ॥
सोमो॑ रा॒जा व॒रु॒णो दे॒वा ध॒र्म॒सुव॑श्च ये ।
ते ते॒ वाच॑ सु॒वन्तां॑ ते ते॒ प्रा॒ण सु॒वन्तां॑ ते ते॒ चक्षुः॑ सु॒वन्तां॑ ते ते॒
श्रोत्र॑ सु॒वन्तां॑ सोम॑स्य त्वा द्यु॒म्नेना॒भि षि॒ञ्चाम्य॒ग्ने - [] 27

TS 1.8.14.1 (Padam)

सोम॑स्य । त्वि॒षिः । अ॒सि । तव॑ । इ॒व । मे॒ । त्वि॒षिः । भू॒यात् ।
अ॒मृत॑म् । अ॒सि । मृ॒त्योः । मा॒ । पा॒हि । दि॒द्योत् । मा॒ । पा॒हि ।

अ॒वै॒ष्टा इ॒त्यव॑-इ॒ष्टाः । द॒न्द॒शू॒काः । नि॒रस्त॑मि॒ति निः-अस्त॑म् ।
नमु॑चेः । शि॒रः ॥ सोमः॑ । रा॒जा ॥ वरु॑णः । दे॒वाः ।
ध॒र्मसु॑व इति॑ ध॒र्म-सु॑वः । च । ये ॥ ते । ते । वाच॑म् । सु॒वन्ता॑म् ।
ते । ते । प्रा॒णमि॑ति प्र-अ॒नम् । सु॒वन्ता॑म् । ते । ते । चक्षुः॑ ।
सु॒वन्ता॑म् । ते । ते । श्रोत्र॑म् । सु॒वन्ता॑म् । सोम॑स्य । त्वा । द्यु॒म्नेन॑ ।
अ॒भीति॑ । सि॒ञ्चामि॑ । अ॒ग्नेः । 27 (50)

TS 1.8.14.2

स्तेज॑सा सूर्य॑स्य वर्च॑सेन्द्र॑स्येन्द्रि॑येण मि॒त्रावरु॑णयोर्वी॒र्येण॑
मरु॑तामोज॑सा क्ष॒त्राणां॑ क्ष॒त्रप॑तिरस्यति॑ दि॒वस्पा॑हि
स॒माव॑वृ॒त्रन्न-ध॒रागु॑दीची-रहिं॑ बु॒द्धि॒नय॑मनु स॒ञ्चर॑न्तीस्ताः
पर्व॑तस्य वृष॑भस्य पृ॒ष्ठे नाव॑श्चरन्ति स्व॒सिच॑ इया॒नाः ॥
रुद्र॑ य॒त्ते क्र॒यी परं॑ नाम॒ तस्मै॑ हु॒तम॑सि य॒मेष्ट॑मसि ।
प्रजा॑पते न त्वदे॒तान्य॒न्यो वि॒श्वा जा॒तानि॑ परि॒ ता () ब॑भूव ।
यत्का॑मास्ते जुहु॒मस्तन्नो॑ अस्तु वय॑ꣳ स्याम॒ पत॑यो रयी॒णाम् ॥ 28

TS 1.8.14.2 (Padam)

तेजसा । सूर्यस्य । वर्चसा । इन्द्रस्य । इन्द्रियेण । मित्रावरुणयोरिति
मित्रा – वरुणयोः । वीर्येण । मरुताम् । ओजसा । क्षत्राणाम् ।
क्षत्रपतिरिति क्षत्र – पतिः । असि । अतीति । दिवः । पाहि ।
समाववृत्रन्निति सं – आववृत्रन् । अधराक् । उदीचीः । अहिम् ।
बुद्धिधनयम् । अन्विति । सञ्चरन्तीरिति सं-चरन्तीः । ताः ।
पर्वतस्य । वृषभस्य । पृष्ठे । नावः । चरन्ति । स्वसिच
इति स्व-सिचः । इयानाः ॥ रुद्र । यत् । ते । क्रयि । परम् । नाम ।
तस्मै ॥ हुतम् । असि । यमेष्टमिति यम – इष्टम् । असि ॥
प्रजापत इति प्रजा-पते । न । त्वत् । एतानि । अन्यः । विश्वा ।
जातानि । परीति । ता () । बभूव ॥ यत्कामा इति यत् – कामाः ।
ते । जुहुमः । तत् । नः । अस्तु । वयम् । स्याम । पतयः ।
रयीणाम् ॥ 28 (61) (अग्ने-स्तै-कादश च) (A14)

TS 1.8.15.1

इन्द्रस्य वज्रोऽसि वार्त्रघ्नस्त्वयाऽयं वृत्रं वद्ध्यान्
मित्रावरुणयोस्त्वा प्रशास्त्रोः प्रशिषा युनज्मि यज्ञस्य योगेन

वि॒ष्णोः॑ क्र॒मो॑ऽसि॒ वि॒ष्णोः॑ क्रान्त॒मसि॑ वि॒ष्णोर्वि॑क्रान्त॒मसि॑ मरु॒तां॑
प्र॒सवे॑ जेष॒माप्तं॑ म॒नः॑ स॒म॒ह॒मिन्द्रि॑येण॒ वी॒र्ये॑ण प॒शूनां॑ म॒न्युर॑सि॒ तवे॑व
मे म॒न्युर्भू॑यान्नमो॒ मात्रे॑ पृथि॒व्यै मा॑ऽहं मा॒तरं॑ पृथि॒वीꣳ

हिꣳसि॒षं मा – [] 29

TS 1.8.15.1 (Padam)

इन्द्र॑स्य । व॒ज्रः॑ । अ॒सि॒ । वा॒र्त्रघ्न॑ इति॒ वा॒र्त्र-घ्नः॑ । त्वया॑ । अ॒यम् ।
वृ॒त्रम् । व॒द्ध्य॑त् । मि॒त्राव॑रुणयो॒रिति॑ मि॒त्रा – व॑रुणयोः । त्वा ।
प्र॒शास्त्रो॑रिति॒ प्र-शा॑स्त्रोः । प्र॒शिषे॑ति॒ प्र-शि॑षा । यु॒न॒ज्मि॒ । य॒ज्ञस्य॑ ।
यो॒गेन॑ । वि॒ष्णोः॑ । क्र॒मः॑ । अ॒सि॒ । वि॒ष्णोः॑ । क्रान्त॒म् । अ॒सि॒ ।
वि॒ष्णोः॑ । वि॒क्रान्त॑मिति॒ वि – क्रान्त॒म् । अ॒सि॒ । म॒रुता॑म् ।
प्र॒सव॑ इति॒ प्र – स॒वे । जेष॒म् । आ॒प्तम् । म॒नः॑ । स॒मिति॑ । अ॒हम् ।
इन्द्रि॑येण । वी॒र्ये॑ण । प॒शूना॑म् । म॒न्युः॑ । अ॒सि॒ । तव॑ । इ॒व । मे॒ ।
म॒न्युः॑ । भू॒यात् । न॒मः॑ । मा॒त्रे । पृथि॒व्यै । मा॑ । अ॒हम् । मा॒तर॑म् ।
पृथि॒वीम् । हिꣳसि॒षम् । मा॑ । 29 (50)

TS 1.8.15.2

मां॑ मा॒ता पृ॒थि॒वी हि॒॒सी॒दिय॑द॒स्यायु॑-र॒स्यायु॑र्मे॒ धे॒ह्यूर्ग॒स्यूर्जं॑ मे॒ धेहि॑
यु॒ङ्क्षि॑सि॒ वर्चो॑ऽसि॒ वर्चो॑ मयि॒ धे॒ह्यग्ने॑ गृ॒हप॑तये॒ स्वाहा॑ सो॒माय॑
व॒नस्प॑तये॒ स्वाहे॑न्द्र॒स्य ब॑लाय॒ स्वाहा॑ म॒रुता॑मो॒जसे॑ स्वाहा॒ ह॒॒सः
शु॒चिष॑द् व॒सुर॑न्त॒रिक्ष॑-स॒द्भोता॑ वे॒दिष॑दति॒थि दु॑रोण॒सत् ।
नृ॒षद् व॑र॒सदृ॑त॒सद् व्यो॑म॒सद॑ब्जा गो॒जा ऋ॑त॒जा ()
अ॒द्रि॒जा ऋ॑तं बृ॒हत् ॥ 30

TS 1.8.15.2 (Padam)

माम् । मा॒ता । पृ॒थि॒वी । हि॒॒सी॒त् । इ॒यत् । अ॒सि॒ । आ॒युः । अ॒सि॒ ।
आ॒युः । मे॒ । धे॒हि॒ । ऊ॒र्क् । अ॒सि॒ । ऊ॒र्ज॑म् । मे॒ । धे॒हि॒ । यु॒ङ् ।
अ॒सि॒ । वर्चः॑ । अ॒सि॒ । वर्चः॑ । मयि॒ । धे॒हि॒ । अ॒ग्ने॑ ।
गृ॒हप॑तय॒ इति॑ गृ॒ह-प॑तये॒ स्वाहा॑ । सो॒माय॑ । व॒नस्प॑तये॒ स्वाहा॑ ।
इ॒न्द्र॒स्य । ब॑लाय॒ स्वाहा॑ । म॒रुता॑म् । ओ॒जसे॑ । स्वाहा॑ । ह॒॒सः ।
शु॒चिष॑दिति॒ शुचि॑ - सत् । व॒सुः । अ॒न्त॒रि॒क्ष॒दित्य॑न्त॒रि॒क्ष - सत् ।
हो॒ता । वे॒दिष॑दिति॒ वेदि॑ - सत् । अ॒ति॒थिः । दु॒रो॒ण॒स॒दिति॑
दु॒रो॒ण - सत् ॥ नृ॒ष॒दिति॑ नृ - सत् । व॒र॒स॒दिति॑ वर - सत् ।

ऋ॒त॒स॒दि॒त्यृ॒त – स॒त् । व्यो॒म॒स॒दि॒ति॒ व्यो॒म – स॒त् । अ॒ब्जा
इ॒त्यप् – जाः । गो॒जा इति॑ गो – जाः । ऋ॒त॒जा इत्यृ॒त–जाः () ।
अ॒द्रि॒जा इत्य॑द्रि – जाः । ऋ॒तं । बृ॒हत् ॥ 30 (53)

(हि॒॒सि॒षं म–॒र्त॒जा–स्त्री॑णि च) (A15)

TS 1.8.16.1

मि॒त्रो॒ऽसि॒ वरु॑णो॒ऽसि॒ सम॑हं वि॒श्वैर्दे॑वैः क्ष॒त्रस्य॑ ना॒भिर॑सि क्ष॒त्रस्य॑
यो॒नि॒र॒सि स्यो॑ना॒मा सी॑द सु॒षदा॑मा सी॒द मा त्वा हि॒॒सी॒न्मा मा
हि॒॒सी॒न्नि ष॑सा॒द धृ॒तव्र॑तो वरु॑णः प॒स्त्या॑स्वा सा॒म्राज्या॑य सु॒क्रतु॑
ब्र॒ह्मा(३)न् त्व॑ रा॒जन् ब्र॒ह्मा॒ऽसि स॒विता॑ऽसि स॒त्यस॑वो ब्र॒ह्मा(३)न्
त्व॑ रा॒जन् ब्र॒ह्मा॒ऽसी॒न्द्रो॒ऽसि स॒त्यौजा॑ – [] 31

TS 1.8.16.1 (Padam)

मि॒त्रः । अ॒सि । वरु॑णः । अ॒सि । स॒मि॒ति॒ । अ॒हम् । वि॒श्वैः॑ । दे॒वैः ।
क्ष॒त्रस्य॑ । ना॒भिः । अ॒सि । क्ष॒त्रस्य॑ । यो॒निः । अ॒सि । स्यो॑ना॒म् ।
ए॒ति॒ । सी॒द । सु॒षदा॑मि॒ति॒ सु – स॒दाम् । ए॒ति॒ । सी॒द । मा । त्वा ।
हि॒॒सी॒त् । मा । मा । हि॒॒सी॒त् । नी॒ति॒ । स॒सा॒द ।
धृ॒तव्र॑त इति॑ धृ॒त – व्र॒तः । वरु॑णः । प॒स्त्या॑सु । ए॒ति॒ ।

साम्राज्यायेति सां-राज्याय । सुक्रतुरिति सु- क्रतुः । ब्रह्मा(3)न् ।
त्वम् । राजन् । ब्रह्मा । असि । सविता । असि । सत्यसव इति
सत्य – सवः । ब्रह्मा(3)न् । त्वम् । राजन् । ब्रह्मा । असि । इन्द्रः ।
असि । सत्यौजा इति सत्य – ओजाः । 31 (50)

TS 1.8.16.2

ब्रह्मा(3)न् त्वञ् राजन् ब्रह्माऽसि मित्रोऽसि सुशेवो ब्रह्मा(3)न् त्वञ्
राजन् ब्रह्माऽसि वरुणोऽसि सत्यधर्मेन्द्रस्य वज्रोऽसि वार्त्रघ्नस्तेन
मे रद्ध्य दिशोऽभ्ययञ् राजाऽभूथ सुश्लोकाँ(4) सुमङ्गलाँ(4)
सत्यराजा(3)न् ।

अपां नप्त्रे स्वाहोर्जो नप्त्रे स्वाहाऽग्नये गृहपतये स्वाहा ॥ 32

TS 1.8.16.2 (Padam)

ब्रह्मा(3)न् । त्वम् । राजन् । ब्रह्मा । असि । मित्रः । असि । सुशेव
इति सु – शेवः । ब्रह्मा(3)न् । त्वम् । राजन् । ब्रह्मा । असि ।
वरुणः । असि । सत्यधर्मेति सत्य – धर्मा । इन्द्रस्य । वज्रः ।
असि । वार्त्रघ्न इति वार्त्र – घ्नः । तेन । मे । रद्ध्य । दिशः ।

अ॒भी॒ति॑ । अ॒यम् । रा॒जा॑ । अ॒भू॒त् । सु॒श्लो॒काँ(४) इति॑
सु – श्लो॒काँ(४) । सु॒मङ्ग॒लाँ(४) इति॑ सु – म॒ङ्ग॒लाँ(४) ।
स॒त्य॒रा॒जा(३)नि॒ति स॒त्य – रा॒जा(३)न् ॥ अ॒पाम् । न॒प्त्रे॑ । स्वा॒हा॑ ॥
ऊ॒र्जः॑ । न॒प्त्रे॑ । स्वा॒हा॑ । अ॒ग्नये॑ । गृ॒हप॑तय इति॑ गृ॒ह – प॒तये॑ ।
स्वा॒हा॑ ॥ ३२ (४०) (स॒त्यौ॒जा–श्च॒त्वारि॒॑श॒च्च॑) (A16)

TS 1.8.17.1

आ॒ग्ने॒यम॑ष्टाक॒पालं॑ निर्व॑पति॒ हिर॑ण्यं दक्षि॑णा सार॒स्वतं॑ चरुं
व॒थ्स॒तरी॑ दक्षि॑णा सावि॒त्रं द्वा॑दशक॒पाल–मु॒प॒ध्व॒स्तो दक्षि॑णा पौ॒ष्णं
चरु॑श्च॒ श्या॒मो दक्षि॑णा बा॒र्ह॒स्प॒त्यं चरु॑श्च॒ शि॒ति॒पृ॒ष्ठो
दक्षि॑णै॒न्द्र–मे॒का॒द॒श॒क॒पाल–मृ॒ष॒भो दक्षि॑णा वा॒रु॒णं द॒श॒क॒पालं
म॒हा॒नि॒र॒ष्टो दक्षि॑णा सौ॒म्यं चरुं॑ ब॒भ्रु॒र्दक्षि॑णा त्वा॒ष्ट्रम॑ष्टाक॒पालश्च॑
शु॒ण्ठो दक्षि॑णा वै॒ष्ण॒वं त्रि॒क॒पालं॑ वा॒म॒नो दक्षि॑णा ॥ ३३

TS 1.8.17.1 (Padam)

आ॒ग्ने॒यम् । अ॒ष्टाक॑पालमि॒त्य॒ष्टा–क॒पालम् । नि॒रि॒ति॑ । व॒प॒ति॑ ।
हि॒र॒ण्यम् । दक्षि॑णा । सा॒र॒स्व॒तम् । च॒रुम् । व॒थ्स॒तरी॑ । दक्षि॑णा ।

सा॒वि॒त्रम् । द्वा॒द॒श॒क॒पा॒ल॒मि॒ति॒ द्वा॒द॒श॒ – क॒पा॒ल॒म् । उ॒प॒ध्व॒स्त
इ॒त्यु॒प – ध्व॒स्तः । दक्षि॑णा । पौ॒ष्ण॒म् । च॒रु॒म् । श्या॒मः । दक्षि॑णा ।
बा॒र्ह॒स्प॒त्य॒म् । च॒रु॒म् । शि॒ति॒पृ॒ष्ठ इति॑ शि॒ति – पृ॒ष्ठः । दक्षि॑णा ।
ऐ॒न्द्र॒म् । ए॒का॒द॒श॒क॒पा॒ल॒मि॒त्ये॒का॒द॒श॒–क॒पा॒ल॒म् । ऋ॒ष॒भः । दक्षि॑णा ।
वा॒रु॒ण॒म् । द॒श॒क॒पा॒ल॒मि॒ति॒ द॒श॒ – क॒पा॒ल॒म् । म॒हा॒नि॒र॒ष्ट इति॑
म॒हा॒–नि॒र॒ष्टः । दक्षि॑णा । सौ॒म्य॒म् । च॒रु॒म् । ब॒भ्रुः । दक्षि॑णा ।
त्वा॒ष्ट्र॒म् । अ॒ष्टा॒क॒पा॒ल॒मि॒त्य॒ष्टा – क॒पा॒ल॒म् । शु॒ण्ठः । दक्षि॑णा ।
वै॒ष्ण॒व॒म् । त्रि॒क॒पा॒ल॒मि॒ति॒ त्रि – क॒पा॒ल॒म् । वा॒म॒नः ।
दक्षि॑णा ॥ 33 (42)

(आ॒ग्ने॒यꣳ हि॒र॒ण्यꣳ सा॒र॒स्व॒तं–द्वि॒च॒त्वा॒रिꣳश॒त्) (A17)

TS 1.8.18.1

स॒द्यो दी॑क्ष॒य॒न्ति॑ स॒द्यः सो॒मं क्री॑ण॒न्ति पु॒ण्ड॒रि॒स्र॒जां प्र य॑च्छति
द॒श॒भि॒र्व॒थ्स॒त॒रैः सो॒मं क्री॑णाति द॒श॒पे॒यो भ॑वति श॒तं ब्रा॑ह्म॒णाः
पि॒ब॒न्ति स॒प्त॒द॒शꣳ स्तो॒त्रं भ॑वति प्रा॒का॒शा॒व॒ध्व॒र्य॒वे द॑दाति
स्र॒ज॒–मु॒द्गा॒त्रे रु॒क्मꣳ हो॒त्रेऽश्वं॑ प्र॒स्तो॒तृप्र॑ति॒ह॒र्तृभ्यां॑ द्वा॒द॒श प॑ष्ठौही ब्र॒ह्म॒णे

व॒शां॑ मै॒त्राव॑रु॒णाय॑र्ष॒भं॑ ब्रा॒ह्म॒णाच्छ॑ँ॒सिने॑ वा॒स॒सी॑ ने॒ष्टापो॑तृ॒भ्या॑
स्थू॒रि॑ यवा॒चित॑-म॒च्छावा॑का॒यान॑ङ्वाह-म॒ग्नी॑धे॒ भार्ग॑वो॒ होता॑ भवति
श्राय॑न्ती॒यं ब्र॑ह्म॒सामं॑ भवति॒ वार॑वन्ती॒यं () म॒ग्नि॑ष्टोम॒सामँ॑
सा॒र॒स्व॒ती-र॒पो गृ॑ह्णाति ॥ 34

TS 1.8.18.1 (Padam)

स॒द्यः॑ । दी॒क्ष॒यन्ति॑ । स॒द्यः॑ । सोम॑म् । क्री॒णन्ति॑ । पु॒ण्ड॒रि॒स्र॒जाम् ।
प्रेति॑ । य॒च्छति॑ । द॒श॒भि॒रिति॑ द॒श-भिः॑ । व॒थ्स॒तरैः॑ । सोम॑म् ।
क्री॒णाति॑ । द॒श॒पे॒य इति॑ द॒श-पे॒यः॑ । भवति॑ । श॒तम् । ब्रा॒ह्म॒णाः ।
पि॒बन्ति॑ । स॒प्त॒द॒शमि॑ति स॒प्त - द॒शम् । स्तो॒त्रम् । भवति॑ ।
प्रा॒का॒शौ । अ॒ध्व॒र्य॒वे॑ । द॒दाति॑ । स्र॒जम् । उ॒द्गा॒त्र इत्यु॑त्-गा॒त्रे ।
रु॒क्म॑म् । हो॒त्रे॑ । अ॒श्वम् । प्र॒स्तो॒तृप्र॑ति॒हर्तृ॑भ्यामिति॑
प्र॒स्तो॒तृप्र॑ति॒हर्तृ॑-भ्यां॑ । द्वा॒द॒श । प॒ष्ठौहीः॑ । ब्र॒ह्म॒णै॑ । व॒शाम् ।
मै॒त्राव॑रु॒णाये॑ति॒ मैत्रा॑ - व॒रु॒णाय॑ । ऋ॒ष॒भम् । ब्रा॒ह्म॒णाच्छ॑ँ॒सिने॑ ।
वा॒स॒सी॑ इति॑ । ने॒ष्टापो॑तृ॒भ्यामि॑ति॒ नेष्टापो॑तृ - भ्याम् । स्थू॒रि॑ ।
यवा॒चित॑मिति॑ यव - आ॒चित॑म् । अ॒च्छावा॑का॒य । अ॒न॒ङ्वाह॑म् ।

पद पाठे (वाक्य सहित) – प्रथमकाण्डे – अष्टमः प्रश्नः

अ॒ग्नी॒ध इ॒त्यग्नि॑ – इ॒धे॑ । भा॒र्गवः॑ । हो॒ता॑ । भ॒वति॑ । श्रा॒यन्ती॑यम् ।
ब्र॒ह्म॒साम॑मिति॑ ब्र॒ह्म – सा॒मम् । भ॒वति॑ । वा॒रव॑न्तीयमिति॑
वा॒र – व॒न्तीय॑म् () । अ॒ग्नि॒ष्टोम॑सा॒ममि॑त्यग्नि॒ष्टोम॑ – सा॒मम् ।

सा॒रस्व॑तीः । अ॒पः । गृ॒ह्णा॒ति ॥ 34 (54)

(वा॒रव॑न्तीयं॑ च॒त्वारि॑ च) (A18)

TS 1.8.19.1

आ॒ग्ने॒यम॑ष्टाक॒पालं॑ निर्व॑पति॒ हिर॑ण्यं दक्षि॑णैन्द्र॒-मेका॑दशक॒पालमृ॑षभो
दक्षि॑णा वै॒श्वदे॑वं च॒रुं पि॒शङ्गी॑ प॒ष्ठौही॑ दक्षि॑णा मै॒त्राव॑रुणी॒-मा॒मिक्षां॑
व॒शा दक्षि॑णा बा॒र्हस्प॑त्यं च॒रुं शि॑तिपृ॒ष्ठो दक्षि॑णाऽऽदि॒त्यां म॒ल्हं
ग॒र्भिणी॑मा ल॑भते मा॒रुतीं॑ पृ॒श्निं प॒ष्ठौही॑-म॒श्विभ्यां॑ पू॒ष्णे पु॒रोडा॑शं
द्वा॒दश॑क॒पालं॑ निर्व॑पति॒ सर॑स्वते स॒त्यवा॑चे च॒रुं स॒वित्रे॑ स॒त्यप्र॑सवाय
पु॒रोडा॑शं द्वा॒दश॑क॒पालं॑ ति॒सृध॑न्व॒ं शु॒ष्कदृ॑ति॒र्दक्षि॑णा ॥ 35

TS 1.8.19.1 (Padam)

आ॒ग्ने॒यम् । अ॒ष्टाक॑पालमि॒त्यष्टा॑-क॒पालम् । नि॒रिति॑ । व॒पति॑ ।
हि॒र॒ण्यम् । दक्षि॑णा । ऐ॒न्द्रम् । ए॒काद॑शक॒पालमि॒त्येका॑दश-क॒पालम् ।
ऋ॒षभः॑ । दक्षि॑णा । वै॒श्वदे॑वमिति॑ वै॒श्व-दे॒वम् । च॒रुम् । पि॒शङ्गी॑ ।

प॒ष्ठौ॒ही॑ । दक्षि॑णा । मै॒त्रा॒व॒रु॒णी॒मि॒ति॑ मै॒त्रा॒-व॒रु॒णी॒म् । आ॒मि॒क्षाम्॑ ॥
व॒शा । दक्षि॑णा । बा॒र्ह॒स्प॒त्यम् । च॒रुम् । शि॒ति॒पृ॒ष्ठ इति॑
शि॒ति॒-पृ॒ष्ठः । दक्षि॑णा । आ॒दि॒त्याम् । म॒ल्हाम् । ग॒र्भि॒णी॒म् । ए॒ति ।
ल॒भ॒ते । मा॒रु॒ती॒म् । पृ॒श्नि॒म् । प॒ष्ठौ॒ही॒म् । अ॒श्वि॒भ्या॒मि॒त्य॒श्वि॒-भ्या॒म् ।
पू॒ष्णे । पु॒रो॒डा॒शम् । द्वा॒द॒श॒क॒पा॒ल॒मि॒ति॑ द्वा॒द॒श - क॒पा॒ल॒म् । नि॒रि॒ति ।
व॒प॒ति । स॒र॒स्व॒ते । स॒त्य॒वा॒च इति॑ स॒त्य - वा॒चे ॥ च॒रुम् । स॒वि॒त्रे ।
स॒त्य॒प्र॒स॒वा॒ये॒ति॑ स॒त्य - प्र॒स॒वा॒य । पु॒रो॒डा॒शम् । द्वा॒द॒श॒क॒पा॒ल॒मि॒ति॑
द्वा॒द॒श - क॒पा॒ल॒म् । ति॒सृ॒ध॒न्व॒मि॒ति॑ ति॒सृ - ध॒न्व॒म् ।
शु॒ष्क॒दृ॒ति॒रि॒ति॑ शु॒ष्क - दृ॒तिः । दक्षि॑णा ॥ 35 (47)

(अ॒ग्ने॒यꣳ हिर॑ण्यमै॒द्र॒मृ॒ष॒भो वै॑श्व॒दे॒वं पि॒शङ्गी॑

बा॒र्ह॒स्प॒त्यꣳ-स॒प्त॒च॒त्वा॒रिꣳश॑त्) (A19)

TS 1.8.20.1

आ॒ग्ने॒य॒म॒ष्टा॒क॒पा॒लं॑ नि॒र्व॒प॒ति॑ सौ॒म्यं च॒रुꣳ सा॒वि॒त्रं द्वा॒द॒श॒क॒पा॒लं॑
बा॒र्ह॒स्प॒त्यं च॒रुं त्वा॒ष्ट्र॒म॒ष्टा॒क॒पा॒लं॑ वै॒श्वान॑रं द्वा॒द॒श॒क॒पा॒लं॑ दक्षि॑णो
रथ॑वा॒हन॒वा॒हो दक्षि॑णा सा॒र॒स्व॒तं च॒रुं नि॒र्व॒प॒ति॑ पौ॒ष्णं च॒रुं मै॒त्रं च॒रुं

ॐ॑ वा॒रु॒णं च॒रुं क्षै॑त्र॒प॒त्यं च॒रु॒मादि॒त्यं च॒रु॒मु॒त्त॒रो रथ॑वा॒हन॒वा॒हो
दक्षि॑णा ॥ 36

TS 1.8.20.1 (Padam)

आ॒ग्ने॒यम् । अ॒ष्टाक॑पा॒लमि॒त्य॒ष्टा-क॑पा॒लम् । नि॒रि॒ति॒ । व॒प॒ति॒ ।
सौ॒म्यम् । च॒रुम् । सा॒वि॒त्रम् । द्वा॒द॒शक॑पा॒लमि॒ति द्वा॒द॒श-क॑पा॒लम् ।
बा॒र्ह॒स्प॒त्यम् । च॒रुम् । त्वा॒ष्ट्रम् । अ॒ष्टाक॑पा॒लमि॒त्य॒ष्टा - क॑पा॒लम् ।
वै॒श्वान॑रम् । द्वा॒द॒शक॑पा॒लमि॒ति द्वा॒द॒श - क॑पा॒लम् । दक्षि॑णः ।
रथ॑वा॒हन॒वा॒ह इति॑ रथ॑वा॒हन-वा॒हः । दक्षि॑णा । सा॒र॒स्व॒तम् । च॒रुम् ।
नि॒रि॒ति॒ । व॒प॒ति॒ । पौ॒ष्णम् । च॒रुम् । मै॒त्रम् । च॒रुम् । वा॒रु॒णम् ।
च॒रुम् । क्षै॑त्र॒प॒त्यमि॒ति क्षै॑त्र - प॒त्यम् । च॒रुम् । आ॒दि॒त्यम् । च॒रुम् ।
उ॒त्तर॑ इत्यु॒त् - त॒रः । रथ॑वा॒हन॒वा॒ह इति॑ रथ॑वा॒हन - वा॒हः ।
दक्षि॑णा ॥ 36 (34)

(आ॒ग्ने॒यꣳ सौ॒म्यं बा॒र्ह॒स्प॒त्यं-च॒तु॒स्त्रिꣳश॑त्) (A20)

TS 1.8.21.1

स्वा॒द्वीं त्वा॑ स्वा॒दु॒ना ती॒व्रां ती॒व्रेणा॑मृ॒तामृ॑तेन सृ॒जामि॑ सꣳसो॒मेन॑
सोमो॑ऽस्य॒श्चि॒भ्यां प॑च्यस्व॒ सर॑स्व॒त्यै प॑च्यस्वेन्द्रा॒य सु॒त्राम्णो॑ पच्यस्व

पु॒नातु॑ ते परि॒स्रुत॑ꣳ सोम॑ꣳ सूर्य॑स्य दुहि॒ता ।

वा॒रेण॑ श॒श्वता॑ तना॑ ॥

वा॒युः पू॒तः प॒वित्रे॑ण प्र॒त्यङ् ख॒सोमो॑ अति॑द्रुतः ।

इ॒न्द्रस्य॑ यु॒ज्यः सखा॑ ॥

कु॒विद॑ङ्ग यव॑मन्तो य॒वं चि॒द्यथा॑ दा॒न्त्यनु॑पूर्व॑ वि॒यूय॑ ।

इ॒हेहै॑षां कृ॒णुत॑ भो॒जनानि॑ () ये ब॒र्हिषो॑ नमो॑वृ॒क्तिं न ज॒ग्मुः ॥

आ॒श्विनं॑ धू॒म्रमा॑ ल॒भते॑ सा॒रस्व॑तं मे॒षमै॑न्द्रमृ॒षभ॑-मै॒न्द्र-

मे॒काद॑शक॒पालं॑ निर्व॑पति सा॒वित्रं॑ द्वा॒दश॑क॒पालं॑ वा॒रुणं॑ द॒श क॒पालꣳ

सोम॑प्रती॒काः पि॒तर॑स्तृ॒ष्णुत॑ वड॒बा दक्षि॑णा ॥ 37

TS 1.8.21.1 (Padam)

स्वा॒द्वीम् । त्वा॒ । स्वा॒दुना॑ । ती॒व्राम् । ती॒व्रेण॑ । अ॒मृता॑म् । अ॒मृते॑न ।

सृ॒जामि॑ । स॒मिति॑ । सो॒मेन॑ । सोमः॑ । अ॒सि ।

अ॒श्विभ्या॑मित्य॒श्वि-भ्या॑म् । प॒च्यस्व॑ । स॒रस्व॑त्यै । प॒च्यस्व॑ ।

इ॒न्द्राय॑ । सु॒त्राण॑ इति॑ सु – त्रा॑णै । प॒च्यस्व॑ । पु॒नातु॑ । ते ।

परि॒स्रुत॑मिति॑ परि – सु॒तम् । सोम॑म् । सूर्य॑स्य । दुहि॒ता ॥ वा॒रेण॑ ।

श॒श्व॒ता । त॒ना ॥ वा॒युः । पू॒तः । प॒वि॒त्रेण । प्र॒त्यङ् । सोमः ।
 अ॒ति॒द्रु॒त इत्य॑ति-द्रु॒तः ॥ इन्द्र॑स्य । यु॒ज्यः । स॒खा ॥ कु॒वित् । अ॒ङ्ग ।
 यव॑मन्त इति यव॑-मन्तः । यव॑म् । चि॒त् । यथा॑ । दा॒न्ति ।
 अ॒नु॒पूर्व॑मित्यनु - पू॒र्वम् । वि॒यूयेति॑ वि - यू॒य ॥ इ॒हेहे॑तीह - इ॒ह ।
 ए॒षाम् । कृ॒णु॒त । भो॒ज॒ना॒नि () । ये । ब॒र्हिषः॑ । नमो॑वृ॒क्तिमि॒ति
 नमः॑ - वृ॒क्तिम् । न । ज॒ग्मुः ॥ आ॒श्विन॑म् । धू॒म्रम् । ए॒ति । ल॒भ॒ते ।
 सा॒र॒स्व॒तम् । मे॒षम् । ऐ॒न्द्रम् । ऋ॒षभ॑म् । ऐ॒न्द्रम् ।
 ए॒का॒द॒श॒क॒पा॒लमि॒त्येका॑द॒श-क॒पा॒लम् । नि॒रि॒ति । व॒प॒ति । सा॒वि॒त्रम् ।
 द्वा॒द॒श॒क॒पा॒लमि॒ति द्वा॑द॒श - क॒पा॒लम् । वा॒रु॒णम् ।
 द॒श॒क॒पा॒लमि॒ति द॒श - क॒पा॒लम् । सोम॑प्र॒तीका॒ इति॑
 सोम॑ - प्र॒तीकाः॑ । पि॒तरः॑ । तृ॒ष्णु॒त । वड॑बा । दक्षि॑णा ॥ 37 (76)

(भो॒ज॒ना॒नि-षड्विं॑शतिश्च) (A21)

TS 1.8.22.1

अ॒ग्ना॒वि॒ष्णू म॒हि त॒द्वां म॒हि॒त्वं वी॒तं घृ॒तस्य॑ गु॒ह्या॒नि ना॒म ।
 दमे॑दमे स॒प्त र॒त्ना द॒धाना॑ प्रति वां जि॒ह्वा घृ॒तमा॑ च॒र॒ण्येत् ॥

अ॒ग्ना॒वि॒ष्णू॒ म॒हि॒ धा॒म॒ प्रि॒यं वां॑ वी॒थो॒ घृ॒तस्य॒ गु॒ह्या॒ जु॒षा॒णा ।

द॒मे॒द॒मे सु॒ष्टु॒ती॒र्वा॒वृ॒धा॒ना प्र॒ति वां॑ जि॒ह्वा॒ घृ॒तमु॒च्च॑र॒ण्येत् ॥

प्र॒ णो॑ दे॒वी सर॑स्वती॒ वा॒जे॒भिर्वा॒जिनी॑वती ।

धी॒ना-म॒वि॒त्र्य॒वतु॑ ।

आ नो॑ दि॒वो बृ॒हतः॑ - [] 38

TS 1.8.22.1 (Padam)

अ॒ग्ना॒वि॒ष्णू॒ इत्य॑ग्ना - वि॒ष्णू॒ । म॒हि॒ । तत् । वा॒म् । म॒हि॒त्व॒मि॒ति॑

म॒हि - त्व॒म् । वी॒तम् । घृ॒तस्य॑ । गु॒ह्या॒नि । ना॒म ॥ द॒मे॒द॒म इति॑

द॒मे-द॒मे । स॒प्त । र॒त्ना॑ । द॒धा॒ना । प्र॒तीति॑ । वा॒म् । जि॒ह्वा॒ । घृ॒तम् ।

एति॑ । च॒र॒ण्येत् ॥ अ॒ग्ना॒वि॒ष्णू॒ इत्य॑ग्ना-वि॒ष्णू॒ । म॒हि॒ । धा॒म॒ ।

प्रि॒यम् । वा॒म् । वी॒थः॑ । घृ॒तस्य॑ । गु॒ह्या॒ । जु॒षा॒णा ॥ द॒मे॒द॒म इति॑

द॒मे - द॒मे । सु॒ष्टु॒ती॒रिति॑ सु-स्तु॒तीः॑ । वा॒वृ॒धा॒ना । प्र॒तीति॑ । वा॒म् ।

जि॒ह्वा॒ । घृ॒तम् । उ॒दि॒ति॑ । च॒र॒ण्येत् ॥ प्रेति॑ । नः॑ । दे॒वी । सर॑स्वती ।

वा॒जे॒भिः॑ । वा॒जिनी॑वतीति॑ वा॒जिनी॑ - व॒ती ॥ धी॒नाम् । अ॒वि॒त्री ।

अ॒व॒तु ॥ एति॑ । नः॑ । दि॒वः॑ । बृ॒हतः॑ । 38 (50)

TS 1.8.22.2

पर्व॑तादा॒ सर॑स्वती॒ यज॑ता॒ गन्तु॑ य॒ज्ञं ।
हव॑ं दे॒वी जु॑जुषा॒णा घृ॑ताची॒ शग्मां॑ नो॒ वाच॑मु॒शती॑ शृ॒णोतु॑ ॥
बृह॑स्पते जु॒षस्व॑ नो॒ ह॒व्यानि॑ विश्वदे॒व्य ।
रास्व॑ रत्ना॒नि दा॑शुषे ॥
ए॒वा पि॒त्रे वि॒श्वदे॑वाय॒ वृष्णो॑ य॒ज्ञैर्वि॑धेम॒ नम॑सा॒ हवि॑र्भिः ।
बृह॑स्पते सु॒प्रजा॑ वी॒रव॑न्तो वय॑ꣳ स्याम॒ पत॑यो रयी॒णां ॥
बृह॑स्पते अति॒ यद॒र्यो अर्॒हाद् द्यु॒मद्वि॒भाति॒ क्रतु॑म॒ज्जने॑षु ।
यद् दी॒दय॑च्छव॒स- [] 39

TS 1.8.22.2 (Padam)

पर्व॑तात् । ए॒ति । सर॑स्वती । य॒जता॑ । गन्तु॑ । य॒ज्ञम् ॥ हव॑म् । दे॒वी ।
जु॒जुषा॒णा । घृ॑ताची॒ । शग्मा॑म् । नः । वाच॑म् । उ॒शती॑ । शृ॒णोतु॑ ॥
बृह॑स्पते । जु॒षस्व॑ । नः । ह॒व्यानि॑ । वि॒श्वदे॑व्येति॒ विश्व॑-दे॒व्य ॥
रास्व॑ । रत्ना॒नि । दा॑शुषे ॥ ए॒वा । पि॒त्रे । वि॒श्वदे॑वायेति॒ विश्व॑-दे॒वाय॑ ।
वृष्णो॑ । य॒ज्ञैः । वि॒धेम॑ । नम॑सा । ह॒विर्भिरि॑ति॒ हविः॑ - भिः ॥
बृह॑स्पते । सु॒प्रजा॑ इति॒ सु - प्र॒जाः । वी॒रव॑न्त इति॒ वीर॑ - व॒न्तः ।

व॒यम् । स्या॒म । पत॑यः । र॒यी॒णाम् ॥ बृ॒ह॒स्प॒ते । अ॒ती॒ति॒ । यत् ।
अ॒र्यः । अ॒र्॒हात् । द्यु॒म॒दि॒ति॒ द्यु – मत् । वि॒भा॒ती॒ति॒ वि – भा॒ति॒ ।
क्र॒तु॒म॒दि॒ति॒ क्र॒तु – मत् । ज॒ने॒षु ॥ यत् । दी॒द॒यत् । श॒व॒सा । 39 (50)

TS 1.8.22.3

त॒प्र॒जा॒त॒ तद॒स्मा॒सु॒ द्र॒वि॒णं॑ धे॒हि॒ चि॒त्रं ।
आ नो॑ मि॒त्रा॒व॒रु॒णा घृ॒तैर्ग॒व्यू॒ति॒-मु॒क्ष॒तं ।
म॒ध्वा॒ र॒जाँ॒सि॒ सु॒क्र॒तू ॥
प्र बा॒ह॒वा॒ सि॒सृ॒तं जी॒व॒से॒ न आ नो॑ ग॒व्यू॒ति॒-मु॒क्ष॒तं घृ॒ते॒न ।
आ नो॑ ज॒ने॒ श्र॒व॒य॒तं यु॒वा॒ना श्रु॒तं मे॑ मि॒त्रा॒व॒रु॒णा ह॒वे॒मा ॥
अ॒ग्निं॑ वः॒ पू॒र्व्यं गि॒रा दे॒व॒मी॒डे॒ वसू॑नां ।
स॒प॒र्य॒न्तः पु॒रु॒प्रि॒यं मि॒त्रं न॑ क्षे॒त्र॒सा॒ध॒सं ॥

म॒क्षू दे॒व॒व॒तो॒ रथः॑ – [] 40

TS 1.8.22.3 (Padam)

ऋ॒त॒प्र॒जा॒ते॒त्य॒त-प्र॒जा॒त॒ । तत् । अ॒स्मा॒सु॒ । द्र॒वि॒णम् । धे॒हि॒ ।
चि॒त्रम् ॥ ए॒ति॒ । नः॑ । मि॒त्रा॒व॒रु॒णे॒ति॒ मि॒त्रा-व॒रु॒णा । घृ॒तैः॑ ।
ग॒व्यू॒ति॒म् । उ॒क्ष॒तम् ॥ म॒ध्वा॒ । र॒जाँ॒सि॒ । सु॒क्र॒तू इति॑ सु-क्र॒तू ॥

प्रेति॑ । बा॒हवा॑ ॥ सि॒सृ॒तम् । जी॒वसे॑ ॥ नः॑ । एति॑ । नः॑ । ग॒व्यू॒तिम् ।
उ॒क्ष॒तम् । घृ॒तेन॑ ॥ एति॑ । नः॑ । जने॑ ॥ श्र॒व॒य॒तम् । यु॒वा॒ना । श्रु॒तम् ।
मे । मि॒त्रा॒व॒रु॒णेति॑ मि॒त्रा – व॒रु॒णा । ह॒वा । इ॒मा ॥ अ॒ग्नि॒म् । वः॑ ।
पू॒र्व्यम् । गि॒रा । दे॒वम् । ई॒डे । व॒सू॒नाम् ॥ स॒पर्य॑न्तः । पु॒रु॒प्रि॒यमि॑ति
पु॒रु॒प्रि॒यम् । मि॒त्रम् । न । क्षे॒त्र॒सा॒ध॒समि॑ति क्षे॒त्र – सा॒ध॒सम् ॥
म॒क्षु । दे॒व॒व॒त इति॑ दे॒व – व॒तः । रथः॑ । 40 (50)

TS 1.8.22.4

शू॒रो वा पृ॒थ्सु॑ का॒सु चि॑त् ।
दे॒वा॒नां यँ॑ इ॒न्म॒नो य॑ज॒मान॑ इ॒य॒क्ष॒त्य॒भी॒द॒य॒ज्व॒नो भु॑वत् ॥
न य॑ज॒मान॑ रि॒ष्य॒सि न सु॑न्वा॒न न दे॑व॒यो ॥
अ॒स॒द॒न्न सु॑वी॒र्य॒मु॒त त्य॑दा॒श्च॒श्चि॒यं ॥
न॒कि॒ष्टं क॑र्म॒णा न॒श॒न्न प्र॑ योष॒न्न योष॑ति ॥
उ॒प क्ष॑रन्ति॒ सि॒न्ध॒वो म॒यो॒भुव॑ ई॒जा॒नं च॑ य॒क्ष्य॑मा॒णं च॑ धे॒नवः॑ ।
पृ॒ण॒न्तं च॑ प॒पु॒रिं च॑ – [] 41

TS 1.8.22.4 (Padam)

शूरः । वा । पृ॒थि॒स्वति॑ पृ॒त्-सु॑ । का॒सु॑ । चि॒त् ॥ दे॒वाना॑म् । यः ।
इत् । मनः । यज॑मानः । इ॒यक्ष॑ति । अ॒भीति॑ । इत् । अ॒यज्व॑नः ।
भु॒वत् ॥ न । य॒ज॒मा॒न । रि॒ष्यसि॑ । न । सु॒न्वा॒न । न । दे॒वयो॑ इति॑
दे॒व-यो॑ ॥ अ॒सत् । अ॒त्र । सु॒वीर्य॑मि॒ति सु॑ - वी॒र्य॑म् । उ॒त । त्यत् ।
आ॒श्वश्चि॑य॒मित्या॑शु-अ॒श्विय॑म् ॥ न॒किः । तम् । क॒र्मणा॑ । न॒शत् । न ।
प्रेति॑ । योष॑त् । न । योष॑ति ॥ उ॒पेति॑ । क्ष॒रन्ति॑ । सि॒न्धवः॑ । म॒योभु॑व
इति॑ म॒यः - भु॑वः । ई॒जा॒नम् । च । य॒क्ष्यमा॑णम् । च । धे॒नवः॑ ॥
पृ॒णन्त॑म् । च । प॒पु॒रिम् । च । 41 (50)

TS 1.8.22.5

श्र॒व॒स्यवो॑ घृ॒तस्य॑ धा॒रा उ॒प॒ यन्ति॑ वि॒श्वतः॑ ॥
सो॒मा॒रु॒द्रा वि॑ वृ॒हतं॑ वि॒षू॒ची॒ममी॒वा या॒ नो ग॑य-मा॒वि॒वेश॑ ।
आ॒रे बा॑धे॒थां नि॒र्ऋ॑तिं प॒राचैः॑ कृ॒तं चि॒दे॒नः प्र॑ मु॒मु॒क्त-म॒स्मत् ॥
सो॒मा॒रु॒द्रा यु॒व-मे॒तान्य॑स्मे वि॒श्वा त॒नूषु॑ भे॒षजा॑नि ध॒त्तं ।
अ॒व स्य॑तं मु॒ञ्च॑तं य॒न्नो अ॑स्ति त॒नूषु॑ ब॒द्धं कृ॑तमे॒नो अ॒स्मत् ॥
सो॒मा॒पू॒षणा॑ ज॒नना॑ र॒यीणां॑ ज॒नना॑ दि॒वो ज॒नना॑ () पृ॒थि॒व्याः ।

जा॒तौ वि॒श्वस्य॑ भु॒वनस्य॑ गो॒पौ दे॒वा अ॒कृ॒ण्वन्न॑मृतस्य॒ नाभिं॑ ॥

इ॒मौ दे॒वौ जा॒यमा॒नौ जु॒षन्ते॒मौ तमा॑सि गू॒हता॑-मजु॒ष्टा ।

आ॒भ्यामिन्द्रः॑ प॒क्वमा॒मास्व॒न्तः सो॒मापू॒षभ्यां॑ ज॒नदु॒स्त्रिया॑सु ॥ 42

TS 1.8.22.5 (Padam)

श्र॒वस्य॑वः । घृ॒तस्य॑ । धा॒राः । उ॒पेति॑ । य॒न्ति । वि॒श्वतः॑ ॥ सो॒मा॒रु॒द्रेति॑

सो॒मा-रु॒द्रा । वी॒ति । वृ॒ह॒तम् । वि॒षू॒चीम् । अ॒मी॒वा । या । नः ।

ग॒यम् । आ॒वि॒वेशे॑त्या - वि॒वेश॑ ॥ आ॒रे । बा॒धे॒थाम् । नि॒र्ऋ॒तिमि॒ति

निः - ऋ॒तिम् । प॒रा॒चैः । कृ॒तम् । चि॒त् । ए॒नः । प्रे॒ति । मु॒मु॒क्तम् ।

अ॒स्मत् ॥ सो॒मा॒रु॒द्रेति॑ सो॒मा-रु॒द्रा । यु॒वम् । ए॒तानि॑ । अ॒स्मे इति॑ ।

वि॒श्वा । त॒नूषु॑ । भे॒षजा॑नि । ध॒त्तम् । अ॒वेति॑ । स्य॒तम् । मु॒ञ्च॒तम् ।

यत् । नः । अ॒स्ति । त॒नूषु॑ । ब॒द्धम् । कृ॒तम् । ए॒नः । अ॒स्मत् ।

सो॒मापू॒षणे॑ति सो॒मा - पू॒षणा॑ । ज॒नना॑ । र॒यी॒णाम् । ज॒नना॑ । दि॒वः ।

ज॒नना॑ () । पृ॒थि॒व्याः ॥ जा॒तौ । वि॒श्वस्य॑ । भु॒वनस्य॑ । गो॒पौ ।

दे॒वाः । अ॒कृ॒ण्वन् । अ॒मृत॑स्य । ना॒भिम् ॥ इ॒मौ । दे॒वौ । जा॒यमा॒नौ ।

जु॒षन्त॑ । इ॒मौ । तमा॑सि । गू॒ह॒ताम् । अ॒जु॒ष्टा ॥ आ॒भ्याम् । इन्द्रः॑ ।

प॒क्वम् । आ॒मा॒सु॑ । अ॒न्तः । सो॒मा॒पू॒ष॒भ्या॒मि॒ति॑ सो॒मा॒पू॒ष – भ्या॒म् ।

ज॒न॒त् । उ॒स्रि॒या॒सु॑ ॥ 42 (75)

(बृ॒ह॒तः-श॒व॒सा-र॒थः-प॒पु॒रिं च-दि॒वो ज॒न॒ना-प॒ञ्च॒विं॒श॒तिश्च॑)
(A22)

=====

Prasna Korvai with starting Padams of 1 to 22 Anuvaakams :-

अ॒नु॒म॒त्या-आ॒ग्ने॒य-मै॒न्द्रा॒ग्न-म॒ग्नये॒-सो॒मा॒य-प्र॒ति॒पू॒रुष॒-मै॒न्द्रा॒ग्नं-
धा॒त्रे - बा॒र्ह॒स्प॒त्य-म॒ग्नये॒-ऽर्थ॒तो-दे॒वीः-स॒मि॒ध॒-सो॒म॒स्ये-
न्द्र॒स्य - मि॒त्र-आ॒ग्ने॒य॒-स॒द्य-आ॒ग्ने॒य॒-मा॒ग्ने॒य॒-स्वा॒द्वीं त्वा-
ऽग्ना॒वि॒ष्णू-द्वा॒वि॒श॒तिः ।)

Korvai with starting Padams of 1, 11, 21 Series of Panchaatis :-

(अ॒नु॒म॒त्यै-य॒थाऽस॒ति-दे॒वी॒रा॒पो-मि॒त्रो॒ऽसि॒-शू॒रो वा-
द्वि॒च॒त्वा॒रि॒श॒त् ।)

First and Last Padam of Eighth Prasnam :-

(अ॒नु॒म॒त्या-उ॒स्रि॒या॒सु ।)

पद पाठे (वाक्य सहित) – प्रथमकाण्डे – अष्टमः प्रश्नः

Kanda Korvai with starting Padams of Eight Prasnas of Kandam 1 :-

(इ॒ष-आ॒पो-दे॒वस्या-ऽऽ द॒दे-दे॒वासु॒राः-सं त्वा-पा॒कय॒ज्ञ-
म॒नु॒म॒त्यै ।)

॥ हरिः ओं ॥

॥ कृष्ण यजुर्वेदीय तैत्तिरीय संहिता प्रथमकाण्डे पद पाठे

अष्टमः प्रश्नः समाप्तः ॥

॥ इति प्रथमं काण्डं ॥

पद पाठे (वाक्य सहित) – प्रथमकाण्डे – अष्टमः प्रश्नः

Details of Panchati and Padam for Kandam 1 , Prasanam 8 – (TS 1.8)

	Panchati	Padams
Anuvakam 1	2	84
Anuvakam 2	1	18
Anuvakam 3	1	70
Anuvakam 4	2	80
Anuvakam 5	3	144
Anuvakam 6	2	103
Anuvakam 7	2	95
Anuvakam 8	1	58
Anuvakam 9	3	133
Anuvakam 10	2	125
Anuvakam 11	1	61
Anuvakam 12	3	141
Anuvakam 13	3	150
Anuvakam 14	2	111
Anuvakam 15	2	103
Anuvakam 16	2	90
Anuvakam 17	1	42
Anuvakam 18	1	54
Anuvakam 19	1	47
Anuvakam 20	1	34
Anuvakam 21	1	76
Anuvakam 22	5	275
Total →	42	2094

Notes:

- Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
- Please download our vedic compilations from our web site “www.vedavms.in”